

國

朝

列

卿

紀

國朝列卿紀卷之四十九

南京兵部尚書總論

南京兵部者因北京而別名也自永樂十九年定鼎北京改留都爲南京惟兵部尤爲重任至正統景泰以後特

勅叅贊機務居六部首而委擢亦不輕矣其間如程公信王公恕陳公俊馬公文升耿公裕張公悅倪公岳韓公文林公瀚喬公宇王公守仁聞望素著於朝野勲實益懋於留務至今有遺稱焉詎拱閑曹如李賢良可嘆已哉思

祖宗締造之艱者其知所以表鎮焉斯善矣

國朝列卿紀卷之四十九

南京兵部尚書年表

張

本

山東東阿人監生  
永樂二十二年任

甄

庸

順天宛平人人才宣德元年  
以工部尚書兼掌本部事

黃

福

山東昌邑人鄉舉宣德十年以戶部尚書  
兼掌本部事參贊軍務正統五年卒于官

徐

琦

陝西寧夏衛籍浙江錢塘人進士正統五年  
任參贊機務景泰三年致仕卒于家謚貞襄

王

驥

直隸束鹿人進士景泰元年以靖遠  
伯守備南京三年解機務命掌部事

張

鳳

直隸安平人進士景泰四年  
任參贊機務五年遷戶部

張

純

湖廣江陵人進士景泰  
五年任天順元年致仕

蕭維禎

江西廬陵人進士歷都察院左都御史天  
順七年改任成化元年致仕卒謚文昭

李賓

順天順義人進士成化元年任

程信

直隸休寧人北直河間籍進士成化七年任十年致仕卒贈太子少保謚襄毅

崔恭

直隸廣宗人進士成化十一年以南京吏部尚書兼署本部事

原傑

山西陽城人進士成化十三年推南京兵部尚書未任病故贈太子少保謚襄敏

王恕

陝西三原人進士成化十四年任

薛遠

直隸無爲人廣東瓊州衛籍進士成化十五年任十六年致仕

陳俊

福建莆田人進士成化十六年任

王恕

見前成化二十年再任二十二年忤旨致仕

馬文升

河南鈞州人進士成化二十二年任

耿裕

河南盧氏人進士成化二十三年任弘治元年遷禮部

張 瑩 直隸華亭人進士弘治二年任六年卒于官贈太子太保謚莊懿

侯 瓚 直隸雄縣人進士弘治六年任九年致仕

張 悅 直隸華亭人進士弘治九年任加太子少保十二年致仕卒贈太子太保謚莊簡

倪 岳 應天上元人進士弘治十二年任

秦民悅 直隸舒城人進士弘治十三年任十四年丁憂後起戶部尚書

主 繼 河南祥符人進士弘治十四年任十六年致仕卒贈太子太保

韓 文 山西洪洞人進士弘治十六年任

王 軾 湖廣公安人進士弘治十七年任加太子太保正德元年致仕贈少保謚襄簡

林 瀚 福建閩縣人進士正德元年任

何 鑑 浙江新昌人進士正德二年任

柴鼎

河南內鄉人進士正德六年任  
七年致仕後起南京工部尚書

劉機

順天大興人進士歷禮部二部尚書閑住  
正德七年起任九年致仕卒贈人子太保

張潔

廣西平南人進士正德九年  
任十年加太子少傅致仕

喬宇

山西樂平人進士正德  
十年任加太子太保

王守仁

浙江餘姚人進士正德十六年任以平逆濠功封  
新建伯嘉靖元年丁憂起總督兩廣乞休卒于途

廖玘

北直東光人進士  
嘉靖元年任

陶琰

山西絳州人進士嘉靖二年任尋加太  
子太保三年致仕卒贈少保謚恭介

秦金

直隸無錫人進士嘉靖二年任  
本年召爲戶部尚書六年致仕

李充嗣

四川內江人進士嘉靖二  
年任七年致仕卒謚康和

王憲

山東東平人弘治庚  
戌進士嘉靖七年任

胡世寧

浙江錢塘人進士嘉靖九年再起本部乞休未任

王廷相

河南儀封籍山西潞州人弘治壬戌進士嘉靖九年任十一年改左都

劉龍

山西襄垣人弘治己未進士嘉靖十二年任十四年致仕贈太子太保謚文安

奏金

詳前嘉靖十四年任加太子太保十五年致仕贈少保謚端敏

王軌

萬全開平衛籍直隸江都人弘治己未進士嘉靖十五年任十八年致仕

湛若水

廣東增城人弘治乙丑進士嘉靖十八年任十九年致仕

熊浹

江西南昌人正德甲戌進士嘉靖十九年任

王堯封

直隸定興人弘治乙丑進士歷總儲尚書嘉靖二十一年起任本年以劾致仕

張邦奇

浙江鄞縣人弘治乙丑進士歷禮部尚書掌詹事府嘉靖二十二年任二十三年卒贈太子太保謚文定

朱景

江西奉新人弘治乙丑進士嘉靖二十三年任二十五年改左都

胡訓

江西南昌人弘治壬戌進士嘉靖二十年任加太子少保二十六年致仕

韓邦奇

陝西朝邑人正德戊辰進士嘉靖二十六年任致仕贈太子少保謚恭簡

王學夔

江西安福人正德甲戌進士嘉靖二十八年任致仕

韓士英

四川南充人正德甲戌進士嘉靖二十九年任

屠楷

廣西桂林人嘉靖癸未進士三十二年任致仕

潘潢

直隸婺源人正德辛巳進士嘉靖三十二年任本年閑住

張經

福建侯官人正德丁丑進士嘉靖三十二年任三十二年改兵部尚書兼副都御史總督浙直軍務

周延

江西吉水人嘉靖癸未進士三十二年任

張時徹

浙江鄞縣人嘉靖癸未進士三十四年任本年閑住

張鏊

江西南昌人嘉靖丙戌進士三十四年任三十九年閑住



江東

山東朝城人嘉靖己丑進士三十  
九年以太子少保任四十年聽調

李遂

江西豐城人嘉靖丙戌進士四十年任

胡松

直隸滁州人嘉靖己丑進士四十五年三月任

郭乾

直隸任丘人嘉靖戊戌進士四十五年任

趙大佑

浙江太平人嘉靖乙未進士隆慶元年起乞終養未任

郭宗臯

山東福山人千戶所人嘉靖己丑進士隆慶元年任本年致仕

劉采

湖廣麻城人嘉靖己丑進士隆慶元年任四年致仕

吳嶽

山東汶上人嘉靖壬辰進士隆慶四年任本年卒

劉自強

河南扶溝縣人嘉靖甲辰進士隆慶四年十一月任

王之誥

湖廣石首人嘉靖甲辰進士隆慶四年任改刑部

劉體乾

直隸東安人嘉靖甲辰進士隆慶六年任

戴才

直隸滄州人嘉靖甲辰進士萬曆二年任

劉光濟

直隸江陰人嘉靖甲辰進士萬曆三年任四年致仕

翁大立

浙江餘姚人嘉靖戊戌進士萬曆四年任五年開仕

楊兆

陝西膚施人嘉靖丙辰進士萬曆五年任七年改北協理戎政

凌雲翼

直隸太倉人嘉靖丁未進士萬曆六年任改河漕

潘季馴

浙江烏程人嘉靖庚戌進士萬曆八年任十年改刑部

匡遴

直隸霸州人嘉靖丁未進士萬曆十年任

劉堯誨

湖廣臨武人嘉靖癸丑進士萬曆十一年任

郭應聘

福建莆田人嘉靖庚戌進士萬曆十二年任

傅希摯

直隸衡水人嘉靖丙辰進士萬曆十四年任十五年改協理戎政

李世達

陝西涇陽人嘉靖丙辰進士萬曆十五年任本年改州鄧尚書

陰武卿

四川內江人嘉靖丙辰進士萬曆十五年任十六年卒贈太子少保

吳文華

福建連江人嘉靖丙辰進士萬曆十六年任十七年養病

楊成

直隸長洲籍吳縣人嘉靖丙辰進士萬曆十七年任十八年告致仕

舒應龍

廣西全州人嘉靖壬戌進士萬曆十九年任

衷貞吉

江西南昌人嘉靖己未進士萬曆二十年任

南京兵部尚書行實

張本字致中山東兗州府東阿縣人洪武末年由國子生擢知揚州府江都縣治縣有法江都之民安之壬午年成祖義兵及境率耆老詣軍門入朝內難平陞知府永樂元年陞江西左叅政四年召爲工部左侍郎六年坐累謫交趾七年召還爲刑部右侍郎奉命督北京河運竣事還益持敬慎議獄必究其情疑者處之率從忠厚數發奸摘伏奇中而紀綱秩秩二十二年仁宗初嗣位重南京根本之地曰張本特立不阿首進南京兵部尚書兼都察院事毅然以革弊舉廢爲務明年被召入見言國家大計遂留行在兵部尚書兼戶部事詳兵部

甄庸字

順天府宛平縣人洪武三十年舉人才授戶部主

事有賢聲革除元年陞松江府知府永樂二年坐累降右軍都督府經歷三年以薦舉擢山西道監察御史出巡廣西地方激揚有體吏畏民懷四年召還陞工部右侍郎本年坐事免官五年復原職十九年定鼎北京尚書扈北命庸掌部事二十二年陞南京工部尚書宣德元年命兼掌兵部事二年致仕庸性凝重言若不出口遇事處之綽有餘裕故人稱爲篤厚君子云見南京工部

黃福字如錫山東昌邑縣人洪武甲子舉人授項城縣主簿改清源歷金吾前衛知事龍驤左衛經歷洪武三十一年超陞工

部右侍郎壬午年 文廟入正大統陞工部左侍郎本年陞工部尚書永樂三年調北京行部尚書提督營造工役四年有罪謫爲辦事官尋復原職本年 命理兩廣軍餉五年 命鎮撫交趾掌布按二司事二十二年 仁廟嗣位召任工部尚書兼詹事府詹事宣德元年 命再鎮交趾回京四年總理河道五年調行在戶部尚書七年以南京根本重地改戶部尚書十年奉 勅守備南京叅贊機務事二年陞少保仍兼戶部尚書有白金綵幣之賜進階光祿大夫正統紀元春二月建言近年天下官藩臬郡學者不以作養人才爲重徒以徵科爲急學校經年不暇考選士子至有不通文學難以常官宜專設憲職提調

學校必選於衆文學才行兼備足爲儀者乃可充之用是天下學校一變舊習又上言四事曰鈔法曰鹽法曰官俸曰田賦皆切時務詳南京戶部

徐琦字良玉浙江杭州府錢塘縣人祖富成寧夏琦在邊事文學舉永樂乙未進士授行人歷刑部主事陞員外郎四年行在兵部尚書張本薦琦才略洞達邊務上可之改兵部職方司員外郎六年黎利倡亂南部或勸上撫之大臣有薦琦者陞行在右通政以往琦至諭以父子之言利感悟矢情乞憐遣使及方物以獻八年使還遷兵部右侍郎正統三年英廟以安南貢額不足南征士卒未盡返驛召再往則黎利已死而其子

麟蓄疑未服琦以國威折之強麟自行及欲質其愛子麟恐鑄金人鑿父名於背遣使請罪於朝上大悅宴賚特厚復命落其戎籍蓋異數也五年進南京兵部尚書叅贊機務景泰三年九月得痰疾上章乞謝政明年三月卒年六十八謚貞襄琦深沉有斷提重兵守南京二十餘年發言盈廷琦沉默久之乃曰行固當然已而果然衆莫不服其識所遺有文集奏議若干卷菽園雜記云本朝軍衛舊無學今天下衛所凡與府州縣同治一城無學可附者皆立衛學宣德十年從兵部尚書徐琦之請也

王驥字尚德直隸保定府束鹿人永樂丙戌進士授兵科給事



中歷山西副使陞順天府尹進兵部右侍郎陞尚書封靖遠伯  
景泰元年守備南京三年解機務後命兼兵部尚書掌部事詳  
兵部

張鳳字子儀直隸真定府安平縣人宣德丁未登進士第癸丑  
春擢刑部江西司主事時江西豪民爲逆者千餘人一訊皆得  
其情獄上獲生者數百人能譽大振大司寇嘉其才特令總闡  
部章奏及錄在京逮繫人正統戊午冬陞授本部右侍郎由主  
事而進侍郎者前未有也已未夏以京城草廠出納多弊勅  
巡督之辛酉春改南京戶部右侍郎鳳上疏曰南京根本重地  
糧不可不素蓄宜每歲分米二萬石遂定爲令至是勅兼督蓋

以出納嚴慎故時人以其執法呼張板 朝廷亦知其名已已

春 賜璽書嘉獎有清勤公正之褒賚以白金文綺景泰壬申  
春陞本部左侍郎未幾進尚書明年廷議轉南京兵部尚書叅  
贊守備又明年召爲戶部尚書詳南京戶部

張純字志忠湖廣荊州府江陵縣人初以鄉舉試禮部下第例  
授教職純疏求入太學登永樂辛丑進士尋擢四川道監察御  
史宣德四年奏言南京國子監生有及一二十年未得進用有  
負 朝廷作養之意請令兩京監生歷事授官相叅取用庶免  
淹滯 上從之於是移文取年深監生鄭離等四百人送行在  
吏部選用屢奉差遣多著風裁正統元年陞都察院右僉都御

史協理院事景泰元年陞南京都察院右副都御史兼提督江防操軍三年陞南京都察院右都御史掌院事素侈縱設席會諸僚惟總理糧儲右副都御史軒輊不赴饋之卓食亦不受衆益憚輒特介薄純所爲五年陞南京兵部尚書叅贊機務在部無所建明天順元年致仕

蕭維禎本名兆江西吉安府廬陵縣人宣德庚戌進士授刑部主事歷本部郎中正統九年陞大理寺右寺丞十四年車駕北征陞大理寺左少卿本年陞大理寺卿景泰三年陞都察院左都御史協陳鑑理院事與易儲議加太子少保四年陳鑑致政專掌院事維禎久任法官老於斷案而心術陰險善炫風跡

大學士陳循屢欲薦引入閣不果景泰八年春正月上染疾羣臣患之十一日維禎同副都徐有貞率十三道同百官於左順門外大監與安自內出問曰若等何官荅曰乃都御史五府六部堂上官聖體不安謹來問安安以指作十字謂病之篤不過十日耳鄙曰若皆朝廷大臣耳目不能爲社稷計日日徒閒安耳衆乃惶惶而退卽日維禎同有貞集十三道御史議曰與安之言若皆達其意否衆曰儲皇一立無他患矣請早立之維禎喜曰斯議得矣衆還道中作封事草其略曰聖躬不寧五日未朝內外憂懼京民震恐蓋謂儲皇未立以致如此伏望皇上早建元良正位東宮以正人心草呈堂維禎錄於

會稿次日早具稿於 朝集文武羣臣石亨張輓張軏于謙王  
文胡濙楊善等於左掖門議允僉題維禎舉筆曰我更一字乃  
更建字爲擇字更筆笑曰吾輩亦欲更也是日登正本進 奏  
手有三口本出奉 聖旨朕這幾日偶患寒疾是以不曾視朝  
待正月十七日朝請擇元良一節難准報院達道皆勃勃有憂  
慮御史楊瑄錢進美英同曰斯當復請未及禮部尚書胡濙令  
一辦事官赴道報曰請立東宮事今本部約閣下及文武大小  
羣臣於十七日待 上視朝合辭懇請令來報知僉名瑄等不  
勝忻忻約曰若 上再不可若等皆免冠叩頭辭職乞還田里  
滿朝若是 上亦動心無乃不可乎會議于禮部學士商榷上

筆章奏其大略曰天下者太祖太宗之天下傳之於宣宗陛下宣宗之子見深宣宗之孫以祖父之天下傳之於孫此萬古不易之常法稿成十五日登正本令僉姓氏衆字畫多訛至十六日晡時方完是日先進題知本具門閉矣衆曰不先題知明日對仗進呈亦無害也徐有貞時常往返石亭家莫知其故是日未莫有貞自造亨家燃燭時方出十七日四鼓時衆集于朝人人謹待上出以期事濟頃之南城呼噪震地羣臣失色須臾鳴鍾鼓上皇御極於是朝野騰懼以爲復見太平本遂不進旨下擒于謙王文等以其迎立外藩故也徐有貞等嗾言官給事中王鎮等誣劾王于二少保等迎立外藩不

軌事至謂事雖傳聞情實難容下多官會問于俛首不辨曰辨也死不辨也死 朝廷赦得我衆人亦不肯惟王文條析折辨衆莫能難維禎阿附曹吉祥石亨徐有貞等害于謙等乃謂事出 朝廷不承亦難免文致獄案擬謀逆重罪凌遲處死陳循江淵蕭鎡俞士悅項文曜王偉古鏞丁澄等俱知情斬罪奉

旨于謙王文結同內賊王誠舒良張永王勤等構成邪謀逢迎景泰篡易東宮依阿從諛廢黜正后內外奸朋紊亂朝廷擅奪兵權將軍國大事都壞了近因景泰有疾不能臨朝視政這廝每自知罪惡深重恐朕不容因共謀爲不軌糾合心腹都督范廣等要將總兵官等擒殺迎立外藩以得私恩動搖社稷其一般

奸臣黨陳循蕭鑑項文耀江淵俞士悅王偉古鏞丁澄商輅亦  
各知前謀不行發舉及朕復位這廝每奸謀節次敗露已將于  
謙王文王誠徐良張永王勤處以極刑籍沒家產成丁男子俱  
發充軍仍將其餘奸黨陳循等發口外永遠充軍役及原籍爲  
民了論這廝每圖危 宗社的情理窮兇極惡本當族滅如今  
體上天好生之德都從輕處置了今內外的官務要竭誠盡忠  
奉公守法以保身家不許似這廝每朋奸亂政違了必誅不饒  
都察院便出榜諭多人知道欽此論者謂于謙等之冤雖曹石  
有貞等主之而維禎黨奸誣忠律當反坐未幾 上燭其奸調

南京都察院四年陞南京刑部尚書後左都御史寇深爲吉祥



姪曹欽殺死舉代者太學士李賢薦維禎可用上曰此人曾在吉祥處通情吉祥力薦之非端士也遂不用七年改南京兵部尚書叅贊機務成化元年建議南監額設夫隸存留應用外餘者退歸於所議艱難地方本年致仕卒謚文昭

李賓字廷用順天府順義縣人正統乙丑進士累官太僕寺卿景泰四年陞都察院右副都御史提督軍務兼巡撫順天永平地方初因已巳土木之變疆圉孔棘朝廷勅都御史鄒來學提督軍務總理糧儲兼巡撫順天永平二府整飭紫荆倒馬等關邊備又舉山東按察使副使一人從之問刑賓至以時無事乃散兵歸民籍其糧歸官邊儲獲助天順元年改爲大理寺卿

時 詔書布曠蕩之恩奸盜輕於犯法掏竊滋漫良善不獲安  
生各該衙門相沿將竊盜罪囚有犯一次二次曾經刺字者俱  
遇 赦宥俱免通論以革後所犯論初犯免刺發審實具題竊  
盜律內節開竊盜初犯於右小臂膊上刺竊盜二字再犯刺左  
小臂膊三犯者絞以曾經刺字掏摸罪同若軍人爲盜雖免刺  
字三犯一體處絞今法司問犯人楊山廝等所犯竊盜俱除革  
前不坐革後初犯恐非律之正文未見曾否奏准以此論斷有  
未允當幸遇 聖明法令惟謹臣等職係叅駁不敢輕易循襲  
又况律爲萬世常規赦係一時恩例又今盜賊多係平昔不務  
生理之人專一糾合爲盜及至事發問擬做工往往隨卽在逃

仍又爲盜習以爲常略無忌憚見問者未結而犯之者卽至以致賊盜繁興良善受害若欲弭盜以安民必須依律而坐罪今後法司所問竊盜合無照依正統年間刑部等衙門官會議奏奉 欽依內事理通以革前革後准 一犯論仍將所論革前革後明白開奏定奪永爲遵守又因刑部擬罪大刻具奏用法莫貴於寬平發落莫患於不一用法寬平則人易信服而法亦可恒法不一則難以奉行而民亦無所措手足矣且如犯人聶斌等包攬磨菰糧米騙騙脚錢價銀同爲虛費京儲均是坑陷納戶其刑部問斷各犯一則正犯枷號一箇月處以重刑當房人口仍發邊衛充軍一則正犯連當房家小發邊衛充軍似此發

落誠爲不一况此等包攬之人并前項例所開僞印批填勘合者皆愚昧無知一事貪圖少利冒犯刑憲別非元惡大憝之比今包攬糧草之人照依都察院欽奉 聖旨榜例連當房家小發邊衛充軍及僞印批填勘合之條自有僞造印信本律其犯斬罪若此論斷已非輕矣而工部所奏榜例却又要將正犯枷號一月處以重刑當房人口仍發充軍雖元惡大憝亦不過此稽之經傳有曰罪人不孥罰弗及嗣兼且律令家人共犯有止坐尊長之條婦人犯罪有獨坐夫男之例臣等每見 皇上斷一應罪犯處死者或情可矜疑欽蒙 宥死發邊衛充軍止令家人隨住况包攬物料律不該死今法司問擬正犯枷號一月

處以重罪當房人口發邊衛充軍則是不分男女長幼不擇祖  
父子孫皆在遣行名連押解械繫窘辱無所不至似此比問斷  
非正法 上可之三年丁憂五年陞右都御史理院事八年陞  
南京兵部尚書叅贊機務受命之初見餓莩載道首以民食爲  
急奏發倉廩賑貸賴以全活者甚衆復令有司各設常平義倉  
俾饑饉無流移之患時有鹽徒乘巨艦張旗幟羅弓矢鼓角數  
出江上大肆劫掠往來商旅患之賔嚴督操江將士捕獲渠魁  
餘黨悉平叅贊幾年奉 聖書二十餘道夙夜勤勞王事未始  
怠忽處事公平人心悅服成化七年召爲左都御史詳都察院  
程信字彥實直隸徽州府休寧縣人祖社壽洪武間謫居河間

信以易經中正統辛酉順天府鄉試明年第進士授吏科給事中已巳英廟北征偕廷臣上疏諫止不報已而師潰土木虜遂南侵京師戒嚴命守西城上言五事曰新號令以振軍威募勇敢以備警急召勤王以遏南侵設武備以防內變養銳氣以備戰守皆見采納虜首先自西山一帶進薄都城都督孫鏜禦之失利乞領衆入城信堅不可躬督軍自城上以火鎗礮石鼓譟爲鏜援虜引去景泰紀元命充副使持節冊封華陽王凡王府有饋遺悉却之歸陞左給事中辛未九月英廟還自迤北居南宮復上中興固本十事曰敬天求賢納諫謹災節用詳刑選將練兵尚儉隆師而敬天一事則當時天象屢變請景

恭帝隆孝友之實以答天心之仁愛聞者壯之壬申陞山東右  
叅政總理遼東糧餉巡撫都御史奏倉官吏卒盜糧石以上  
者死乃造新斛視舊加二寸付信信立碎而火之曰使彼真盜  
死不足卹今故爲此斛置人於死地豈情也哉遼卒至今能道  
其事會以憂去轉四川分巡所至問民疾苦松藩夷人作亂偕  
侍郎羅綺進攻破其黑虎諸寨天順丁丑英廟復辟奉表人  
賀時方錄景泰間上言之人遂留爲太僕卿二年遼東巡撫賈  
缺陞都察院左僉都御史賜勅以行守將海寧伯董興姻聯  
曹欽信一切裁之以正又造戰車創義倉行贖罪法設月輪簿  
凡百號令一新建州夷酋董山潛結朝鮮乃使上官佟成授之

以成筭往廉之得朝鮮授董山中樞院使制書以還上疏曰乘其未發急遣二使問之可伐其謀 朝廷廼命一給事往朝鮮一錦衣譯者往建州西酋不肯承出制書示之咸相顧愕然則各貢馬謝罪虜酋字來聚衆欲入寇自率師巡邊營於境外者凡三月得風濕之疾自此始都指揮夏霖事多不法與董興相結納僉事胡鼎按其罪四十具以狀聞 詔中官及錦衣衛郭指揮逮霖而籍之不意中途受賂乃奏虛實相半都御史寇深因疾劾信輕聽胡僉事言調南京太僕寺少卿五年會刑部缺堂上官廷臣言非信不可召陞右侍郎尋以憂還河間 憲宗卽位起復兵部又轉左侍郎成化丁亥四川貴州山都掌蠻據



大壩箐之險破合江以上九縣勢甚猖獗陞尚書提督軍務與襄城伯李瑾統番漢兵討之信至永寧自督大軍入金鵝地又分四路兵期會于大壩將士依其方略用神銃勁弩攻賊不能支連破二十餘寨獲銅鼓數十斬首五千級生擒二千餘賊復走入深洞又命軍士以土石塞其門以兵圍之月餘賊死洞中臭聞十餘里又陰察九姓土遼之附於賊者還師撲之未及載都掌悉平又布置衙門邊事以定凱還進兼大理卿有白金綵幣襲衣之賜前此營大壩凡兩月淫雨不時瘴癘瘳興舊恙復作至是四上疏請老俱不允辛卯春上以雨雪不降求言上言兵事可更張者四兵弊可伸理者五詔下所司執政者難

一之米幾三邊有事悉如所料應城伯孫繼先多不法事覺有  
詔下信多請貫之者信執筆奮然曰侯伯乃武臣領袖懲一戒百  
正在於此遂盡發其貪尅諸事繼先坐免黨與皆謫戍嶺表軍  
府肅然又北虜潛伏黃河套中歲爲西患輔臣有請興師十萬  
以大同守將楊信爲總制按勦之信力言河套地曠遠無水草  
興師十萬則餽運者加倍自古禦戎來者拒之去者弗追此不  
易之法而楊信亦止請三萬人巡邊禦敵信曰此大舉亦繁國  
勢之強弱以三萬人按套則少巡邊則多蓋關陝連歲受兵今  
此之往勝形未具而先自困豈謀國之道衆服信言卒與二萬  
人巡邊而罷按套之議七年南京缺叅贊機務大臣交章薦信

及至南京適慧出軒轅乃與六卿合議復上言興利除害三十餘事多見諸行他若汰貪縱修舊典可書者尚多在南京叅贊已四載復疏乞休上重違其志賜勅還鄉有疾若去體其勿久安於家之語明年還休寧里第又四年卒贈太子少保謚襄毅壽六十有三信儀觀魁偉性資剛果六籍八子無不涉獵爲詩文略不經意而雄渾可傳事親孝少時力耕以養居憂廬墓側有芝產之瑞教子弟嚴而有方待內外親族恩義兼盡遇故人子矜恤振拔惟恐不及凡百玩物一不以掛目爲諫官知無不言言必達大體而嫉惡大嚴佐兩藩及法司必以敬正輔長官不隱忍坐視以爲賢掌兩京兵政及征伐俱有成績又能任

怨南京守臣或欲預錢穀詞訟信曰守備機務所以謹非常若此乃有司之事也斷不可預論者以爲得體征川貴時詔以便宜之權付之自發兵至凱還不爵一人不殺一人同事者爲言信曰刑賞人主之大柄懼聞外事不集而假之人若幸而事集又竊弄之豈人臣之道也論者又曰此古名臣之心名臣之言可以爲後世法號晴洲釣者有晴洲釣者集若干卷藏于家

國朝列卿紀

卷之四十一

一

四

國朝列卿紀卷之四十九終

國朝列卿紀卷之五十

南京兵部尚書行實

崔恭字克讓直隸廣宗人正統丙辰進士授戶部

譽提督延綏邊儲出納有法大學士楊溥薦知東萊至舉行六  
事尤加意學校先是府庫壞浥爛過海布若干萬守庫之民苦  
之公命工別構三十間復疏於朝量布及楮幣之過海者餘悉  
折軍士月糧不踰年用盡歸守庫之民八百餘戊辰萊大旱蝗  
躬督捕發郡縣倉勸富民粟賑之又奏免膠州卽墨諸處逋民  
糧草民賴以全活者無慮千餘昌邑童子史奇李春坐流言繫  
獄僉事古鏞必欲置之死地恭曰童子何知力辨其枉又遣爲

邑庠弟子員高審爾人寓於掖縣盜竊其貨以法捕者疑其家  
孫消息所爲同知吳祐執孫拷訊誣服恭以未獲賊疑之禱於  
城隍祠陽令機兵於軍管搜檢陰使人於四門城樓偵之已而  
盜果委其貨於外偵者擒其人來孫獲免又如辯卽墨寡婦之  
執翁姦維縣民婦之誣人爲盜其跡尤奇已巳虜酋也先率醜  
類犯京師聞之泣曰此臣子効力之秋也乃多方集民兵若干  
各給器械委官統領先期勤王虜旣退公卿大臣皆以爲忠六  
載之間威惠大行萊人有古之楊今之崔之謠蓋楊震舊爲萊  
州刺史云景泰壬申陞湖廣右布政使民供一切革去之苗賊  
侵武岡乃督饋餉訓飭民兵往剿之賊聞其來相率歸服岳州

報公安監利流民擅相殺害恭曰爲今之計鎮之以靜願附籍者收之不願者秋成遣歸事行上下稱便未幾調江西左布政使將行悉以解舍中器物歸之有司篋中惟大明律書數卷衣數襲而已奸民有冒關廣濟庫官物餘五十萬者廉得實言於都憲韓雍讞之連坐布政使失職列郡官吏爲之肅然理問所獄囚動二三百計多死乃市傍地而廓其制復蘇活人命無筭又作量地之要法計役之輕重而爲之任一歲之勞者有九年之逸至今行之不改天順戊寅陞都察院右副都御史巡撫蘇松等府所至進耆老俾言其利害及所行當否人以爲得體崑山生龔某以不賂御史歐某黜恭試其文曰科目中人也檄復



學後中科第得顯官無賴民王凱利別籍王氏田廬自首爲軍  
清軍御史郭觀信之連坐隱蔽者二十四人悉配蘇州衛衆奔  
訴卽委所司覈之事遂白竟坐凱以罪而釋其二十四人者都  
督徐恭奏浚儀真漕河命恭兼理其事役軍夫六萬有奇設法  
勸粟工畢尚餘二千石發濟揚州饑民鎮江以南河久淤塞舟  
行屢罹大江風濤之險按其地形起夫十萬浚之經畫有道不  
告勞而大通焉常熟民錢穆告其兄曄不法事或勸宜避嫌恭  
曰苟欲避嫌則凡富者皆視其死於不辜卒以正法處之庚辰  
陞吏部左侍郎置勸懲簿以錄天下人材賢否賢者必言於尚  
書用之否者必指其實黜之時號稱得人成化己丑陞尚書殿

試充讀卷官丁憂七年尋起南京南京官中恃才放恣交通  
賄賂者多乃黜其郎中方嵩門相等十數人士風一新南雍歷  
事滿必抵北紀還而還卒業乃疏其不便南士得紀還於南癸  
巳山東大饑萊之父老相語曰前崔公尚在我輩何至此極邪  
具公善政請於巡按御史立去思碑於楊震祠中甲午勅叅  
贊守備機務與戚國公開心見誠協力政令軍民皆翕然畏服  
城中恃以爲安丙申兩抗章乞休致不允明年夏以不視事者  
三月復乞歸田上特錫璽書以榮其歸文武士餞於國門外  
者千人道傍觀者十里不絕嘖嘖共言其賢詳南京吏部

原傑字子英山西太原府陽曲縣人正統乙丑進士擢廣西道

監察御史奉

勅巡按江西剛決不滯風裁獨著景泰

年陞

江西按察使持身清白不可干以私而吏弊盡除天順年陞

山東左布政使清田賦正均徭民咸宜之成化二年陞都察院

右副都御史巡撫山東地方孤介有爲用法者不少貸五年召

爲戶部左侍郎六年差涖河南考察文武官員八年以憂去九

年江西盜起詔奪情起視保深沉有智略殘孽盡除十年事

寧改左副都御史理院事十二年因荆襄地廣山居三分之一

自李鬻子劉千斤亂後流民雜聚難以控制勅保安撫流民

各得其所因奏立鄖陽行都司并府衛割陝西之漢中商州河

南之南陽唐鄧四川之夔衢湖廣之荆襄安沔添設都御史提

督撫治之及設撫民副使分守叅議亦兼撫民遂爲定制四省  
賴之本年以功陞右都御史十三年陞南京兵部尚書叅贊機  
務未任病故贈太子太保謚襄敏

王恕字宗貫陝西西安府三原縣人正統戊辰登進士授大理  
寺評事歷左寺副未幾陞揚州知府天順間遷江西右布政使  
久之轉河南左布政使未踰年陞都察院右副都御史撫民南  
陽荆襄流民盜平遂勅撫河南進左副都御史風采懍懍後  
改南京刑部左侍郎丁憂成化八年河道淤阻特起刑部左侍  
郎總理尋改南京戶部左侍郎俱有政蹟然猶未甚爲人知也  
會雲南夷獠爲梗改都察院左副都御史巡撫其地時鎮守內

臣私慚外夷誅求無厭人莫敢問恕劾之其下郭英懼而自盡

沒其寶石於官并械送其下數人於京且勸上不寶異物在

雲南九月疏二十上由是直聲動天下進都察院右都御史又

改南京都察院叅贊守備機務提督巡江進兵部尚書仍叅贊

同事者忌之改巡撫南直隸因言古之明王投珠抵璧却千里

馬焚雉頭裘者乞崇恭儉爲天下先凡織造官一切取回珍玩

奇貨令四方無來獻中官王敬乘傳東南搜索奇玩恕言其失

人心損國本傷和氣而召災沴上乃詔戒敬久之敬等俱收

捕下獄同惡王臣斬於市中外稱快謂恕有回天之力仍轉南

京兵部尚書叅贊機務刑部員外郎林俊以諫建永昌寺下獄

經歷張黻掾之亦下獄恕言二人志在進忠而得罪恐人自此以言爲諱設有奸邪誤國誰復爲朝廷言者俄有旨令致仕恕怡然就道詳吏部

薛遠字維遠直隸廬州府無爲州人宣德乙卯中廣東鄉試壬戌登進士第授戶部雲南司主事勤慎精敏不避艱險景泰中以薦遷郎中嘗以部檄覈實南直隸逋稅文案山積洞燭肯綮得其羨餘若干萬石歸之於公又同御史倪敬按大同邊儲搜抉遯隱邊軍足食天順改元年命使交趾還進戶部右侍郎尋丁母夫人憂四年河決河南詔復起工部侍郎往塞之至則集壯丁三萬餘分工授任決口遂塞又自揚州海門鑿河四十

里以洩積潦蠲災賑饑伐材爲屋以居流民比還民遮道留之  
已而復授戶部成化元年兵討兩廣蠻獠命督餉星馳調兵食  
師至如歸仍諭其衆能破賊者卽有輜貨人人奮勇師至大藤  
峽躬冒矢石腹背夾攻賊平陞左侍郎二品俸有白金文綺之  
賜三年進尚書總督京儲六年夏江南運不至遠奉命往視至則  
滌泉源濬河流漕以克濟十三年太監汪直嗾科道馮瓘等劾  
之遠上疏乞致仕許之十五年以近侍吳綬力薦 詔起南京  
兵部尚書叅贊機務是年冬以疾辭不允明年正月汪直復嗾  
都給事張海劾四方水旱皆遠與尚書楊鼎玉復侍郎錢溥所  
致詔許致仕旣而予丕以廕除中書舍人迎就養於京弘治壬

予以建儲恩進階榮祿大夫乙卯卒年八十有二遠性敏而  
好學於凡禮樂兵刑天文律曆無不涉其要尤熟國朝典故  
在戶部最久凡文移奏劄悉出其手子部事例芟繁正訛體要  
歸一均節委積內外遠近多寡輕重莫不法式會較出納吏胥  
拱手正統己巳之變摘卒戍邊以民代漕江南罷焉景泰中有  
言事已宜如舊使詔集議戶部曰不可遂罷復有言者時司  
徒以問遠曰兩議相持不可力奪之以理論之司徒如言遂定  
一每歲中外競陳利害始一人以爲可行又一人以爲可罷前後  
一矛盾有司不知所從遠以爲凡若此者一切報罷則官省民安  
同僚有惡私囑者怒色以待遠曰事可行而行不可行而止何



怒爲論馭吏則曰嚴刑以懲不若先事而養善革弊不如無弊可革也仕宦四十年家無長物食無滋味室無媵妾曰吾少事親恒不足今安忍有餘哉以是人稱其有守

陳俊字時英福建興化府莆田縣人正統丁卯福建鄉試第一戊辰成進士授戶部主事丁外艱服闋仍除舊職景泰天順間歷員外郎中辛巳征兩廣叛寇命往督餉母喪乞守制不許明年師還始歸明年復任成化元年陞南京太常少卿四年召爲戶部右侍郎壬辰勅總督軍餉於秦晉諸邊九年遷吏部右侍郎十一年轉左十三年陞南京戶部尚書十六年改兵部叅贊機務二十年改南京吏部尚書餘詳吏部

馬文升字負圖河南開封府鉤州人景泰辛未進士授監察御史陞福建按察使歷南京大理寺卿都察院右副都御史轉左陞兵部右侍郎轉左謫戍重慶起左副都御史陞右都御史召爲兵部尚書尋改南京兵部尚書叅贊機務弘治改元召爲左都御史吏部尚書詳吏部

耿裕字好問河南盧氏縣人景泰甲戌進士改翰林庶吉士丙子授戶科給事中尋改工部天順元年改翰林院檢討出判泗州旣而丁清惠公憂服滿改定州成化乙酉朝廷知裕無罪召還復檢討丙戌同考禮部會試預修英宗實錄進修撰仍充經筵講官癸巳陞國子監司業丙申陞祭酒明年擢吏部右

侍郎丁母憂服除轉左侍郎丙午擢本部尚書俄改南京禮部  
丁未 孝宗卽位轉南京兵部叅贊機務裕器度弘遠人莫測  
其涯涘居留都二年鎮靜持重論者謂得大臣體弘治元年召  
爲禮部尚書詳吏部

張鑒字廷器直隸松江府華亭縣人正統戊辰進士景泰元年  
擢監察御史北虜內寇承 勅往北畿河南山東清理馬政密  
雲譌言有不軌者受密命往察且撫定之出按宣府大同有都  
御史子犯法乃按其罪并劾其父罷之以宣府將佐多冗請分  
守獨石諸邊歸總諸道奏牘事繼承 勅巡臨清按治豪猾餘  
黨悉散天順三年陞江西副使風裁肅清吏不敢欺七年陞江

西按察使寡默博洽居官務安靜輿論或謂其無爲然事賴曲成者實多有贛州賊作亂以預捕獲功賜金帛綵幣成化二年陞陝西左布政使督運邊餉用不告乏三年陞都察院右副都御史巡撫寧夏地方城皆土築始甃以甃導河流以溉屯田若干頃修衛學給廩食科不乏人嘗帥兵行邊與賊戰歸所擄男婦及牛羊器械 賜勅褒諭陝西固原達官滿四叛會 王師出征劾守將致變者寘之法時寧夏所屬地方多永樂所置降虜 朝廷慮其爲變受 密勅撫之各安其業七年丁憂十年起原職巡撫保定等府值久旱給民牛種俾不廢業復承 勅勾稽戎籍 王師出宣府督軍餉不乏十一年改大同斬首虜

奪兵械築城浚濠清理屯種復被勅褒諭虜酋卽加恩蘭知有備請入貢具奏許之十三年召爲刑部右侍郎十七年轉左江西有大獄連引千餘人命往勘皆得實十九年陞刑部尚書用刑多主平反囚不酷死者實多侍經筵讀進士卷賜酒饌楮錫會朝廷遣內臣錄囚乃察情可矜疑者奏釋若干人賜楮錫加以羊酒二十二年加太子少保尋丁憂服闋孝宗御極太宰王恕重公謹厚起南京兵部尚書叅贊機務秩如故以國家根本重地政尚簡靜兵民悅服蓋自筮仕以來歷三朝四十有六年更十命年七十有一而卒其始所樹立施措舉克自遂而終厚重持之長髯偉幹襟量夷坦與人謙讓不事矯

飾不以富貴加人人以是稱之六年卒於官壽七十二贈太子太保謚莊懿

侯瓚字奉璋直隸保定府雄縣人景泰甲戌進士授戶部主事天順中陞戶部員外郎成化二年陞鳳翔知府八年陞山西右叅政十七年陞光祿寺卿二十一年陞都察院右僉都御史巡撫甘肅二十二年陞兵部右侍郎本年改南京禮部二十三年轉南京戶部左侍郎掌部事弘治五年陞南京工部尚書六年擢南京兵部尚書叅贊機務九年致仕進階榮祿大夫卒於家其歷官未有顯績而朴直坦夷亦無他腸

張悅字時敏直隸松江府華亭縣人天順庚辰進士自少凝靜

持重十八從進士陳文璧游篤學力行已爲鄉里所推重初授  
刑部主事歷員外郎奉職守法以不欺爲本朝士有囑其所親  
者曰不敢撓公法但乞假一詞使知某嘗有言耳訖事而問之  
曰其人無大罪旣據法施之矣敢僞言以市恩聞者歎服未幾  
陞江西僉事持大體不事苛察尋改浙江提學始以糊名校士  
尋去之曰我且自疑人誰信我請託觀觀屹不爲動而士皆帖  
服無敢干以私者所獎拔往往取魁甲爲聞人衆神其明而莫  
測其所爲用成化十四年陞四川副使十五年進湖廣按察使  
甲辰入覲時中官尚銘在東廠任事衆羣趨其門悅獨不往銘  
銜之伺察無所得未幾銘敗而其名益彰二十二年進都察院

右僉都御史二十三年陞工部右侍郎 孝廟嗣登大寶在朝  
大臣相率上疏去位悅獨不可曰更新之始正當竭心報國豈  
可以去言邪弘治元年遷禮部二年再遷吏部右侍郎五年轉  
左悅於臨事卓有定見癸丑大早上陳遵舊章卹小民崇儉素  
裁冗食禁濫罰數條并修德圖治二疏皆嘉納之時吏部尚書  
王恕負時望尤倚信於悅凡有言無弗從嘗兩攝選議翕然稱  
允六年陞南京都察院右都御史持厲風紀臺中肅然八年陞  
南京吏部尚書鎮定簡靜上下安之雖中官亦加敬禮守備太  
監陳祖生嘗設席獨延寘上坐子弟問更召何人曰他人豈可  
同此席其爲時所重如此九年改南京兵部尚書叅贊機務疑



重不撓留都倚以爲重議事每持大體爲根本遠圖不操切文具十二年加太子少保致仕卒贈太子太保諡莊簡悅平居謹畏小心無疾言厲色至臨事卓有定見未嘗以恩怨利害動其心嘗謂人口占之聖賢其過人遠甚凡所猷爲皆至公無私故其事業光明俊偉今之人去聖賢亦遠矣每事竭其公忠猶恐不及况復濟之以私乎或言有善讀書不善作官者笑曰此正不善讀書耳世豈有遵書本行而誤者尚書王恕去位衆望咸屬悅或言內未有爲之地者悅直視不答其人懼而退性素清約自小官至重任終始一節爲縉紳表率者四十餘年及歸處舊居杜門不出在外公私事一無所預時見風俗奢靡日甚於

是益崇節儉以率子孫至於待賓日常所費亦不敢少豐以助薄俗所尚嘗有言揭屏間以示人曰客至留饌儉約適情殺隨有而設酒隨量而傾雖新親不擡飯雖大賓不宰牲匪直戒奢侈而可久亦將免煩勞以安生故世稱爲名臣云

倪岳字舜咨浙江錢塘縣人應天府上元縣籍天順甲申進士改庶吉士授編修預修英宗實錄遷侍讀選充經筵講官

授皇太子講讀累官翰林學士禮部右侍郎轉左進禮部尚書改南京吏部尚書加太子少保弘治十二年改南京兵部尚書叅贊機務修舉兵政疲弊盡剗又取監生清查軍冊以防姦僞十三年召爲吏部尚書詳吏部

秦民悅字崇化直隸廬州府舒城縣人天順丁丑進士授行人  
司行人歷工部屯田司員外郎成化十年陞廣平府知府剛毅  
開敏多直氣能卓然自立政出公平而百廢修舉士民宜之如  
檢勘荒田馬地共三十餘頃辯寃活獄一十九人招流亡進六  
千戶皆焯然在人耳目十九年滿九載方去民立生祠求大學  
士劉翊紀其政績祀之陞江西右叅政歷三年陞右布政使弘  
治三年轉左民悅在江西凡三任察民情最濫懲政多從寃恕  
不尚嚴苛四年陞都察院右副都御史巡撫順天地方飭薊州  
兵備未幾召爲戶部右侍郎提督倉場六年回理部事七年改  
吏部丁憂十年起復補左副都御史協理部事十一年復改吏

部右侍郎十二年陞南京吏部尚書初官留都給假者紛紛值  
監丞楊文具告給假回籍省祭遷葬養病民悅駁問一狀之內  
四事並告難以施行且嚴禁之於是其風稍息十三年遷南京  
兵部尚書叅贊機務安靜不掠聲稱十四年丁憂後起南京戶  
部尚書詳南京戶部

王繼字述之河南開封府祥符縣人成化丙戌進士授雲南道  
監察御史七年陞陝西按察司僉事十年陞陝西副使十五年  
陞山西按察使十六年丁憂二十年復除福建按察使二十二  
年轉山西右布政使二十三年陞都察院右副都御史巡撫福  
建地方弘治三年改撫宣府地方本年又改撫甘肅地方五年

陞南京兵部右侍郎九年陞戶部左侍郎總督倉儲十年陞戶部尚書仍督倉儲十四年陞南京刑部尚書本年改南京兵部尚書叅贊機務十六年致仕卒於家贈太子少保

韓文字貫道山西洪洞人成化丙戌進士弘治癸亥陞南京兵部尚書叅贊機務先是會守備中官議事多遜避不發一言或探其意嚮以爲可否文曰事之可否有理與法吾惟以無私處之可拱嘿爲避禍計也遇事輒昌言商榷聞者無不敬服時值水旱相仍民饑死者相繼仍移文戶部欲預支三月糧以平糴價所司以未得命爲辭文曰救荒如救焚民命在旦夕能忍死以待耶卽得罪吾請以身任之竟發米十六萬石民賴以安甲

辛改戶部尚書詳戶部

王軾字用敬湖廣荊州府公安縣人天順甲申進士授大理寺  
右評事成化五年陞右寺副七年陞寺正明習法律讞駁平允  
辛三年陞四川按察司副使十五年以憂去接喪二十一年服  
滿補陝西副使弘治二年陞四川按察使三年陞南院右僉都  
御史兼提督江防八年陞都察院右副都御史總理南京糧儲  
本年改巡撫貴州九年陞大理寺卿性溫良操法多從寬恤四  
方訟獄凡經所讞多當其罪公移案牘法家傳以爲式 孝宗  
慎刑獄命同刑部裁定問刑條例至今行之十二年陞南京戶  
部尚書十四年命兼左副都御史提督貴州軍務十六年復命

仍蒞南京戶部事奏准各處解到黃冊如紙張粉飾等項差來人役送問經管人等行彼處巡按提問黃冊駁回另造仍定限造完印封送部轉發後湖查對故違不用印封送者經手官吏人等提問仍照違限月日住俸滿日方許開支若解人遲延止將解人送問駁查紙劄原經里書自備仍差吏書親送查冊官員先將南直江浙湖福川廣弊多處查對每一處二處得完卽差人齎進追問改正其餘以次候通完之日類造總冊赴京復命十七年推南京兵部尚書叅贊機務尋加太子少保正德元年加太子太保致仕卒年六十八贈少保謚襄簡

林瀚字亨大福建福州府閩縣人成化丙戌進士改庶吉士授

丁父母憂八年授翰林院編修十三年陞修撰二十二年陞左春坊左諭德仍兼前職弘治三年太宰王恕薦瀚學行淳正陞國子祭酒上疏請開科貢以進人才大略謂今天下學校作養日盛科貢二途取有定數歲有常規不無遺材淹滯之歎禮部議擬 詔令開貢四年令府學一年二貢州學二年三貢縣學一年一貢九年陞禮部右侍郎仍掌監事在國子學垂十年待諸士嚴而有恩凡差撥歷事定立條規雖勢家子不容請託越次故事祭酒膳役銀歲以百數計悉貯之官購置祭酒公署一次合監師儒公廨悉備實始也十二年陞吏部右侍郎尋轉左與太宰同心掄才務求至公十三年陞南京吏部尚書



鎮定不搖人倚爲重會災異率羣僚陳十二事曰明黜陟去冗官清吏弊定庄田折鹽鈔處監生嚴軍政省供應收才望禁奸貪停不急寬民力有御史自巡按歸逮獄二三儒生寅緣傳奉授中書瀚上疏言御史宜俯垂寬宥以全風憲之職中書宜收回成命以杜倖進之門則天命天討協天下之至公矣疏入忤旨上疏自劾不報十六年復疏重根本以回天變四事曰保固南京以重祖宗之根本言京城內外軍民艱窘宜量發賑濟曰佑啓皇儲以重天下之根本言春宮毓德宜督進修屏耳目之玩好戒禁苑之游觀曰撫綏百姓以重邦家之根本各省兵荒相繼賦役日增宜節省財力慎重名器曰增進賢才

以重致治之根本言明年甲子適符洪武十七年 聖祖開科  
取士之期宜加增鄉試解額以廣賢路識者多服其有裕國遠  
猷且剴切時弊正德改元時冢宰缺人給事中丘俊御史石玠  
交章薦其學優才瞻臨事公平剛方素著廉介久聞宜居其位  
未幾改南京兵部尚書叅贊機務因災異會陳十一事曰隆大  
孝以先天下大略謂 先帝奄忽上賓 陛下親承付託之重  
惟任大臣而不改乎 先帝之所倚用立大政而不易乎 先  
帝之所貽謀黜遠近習而力體 先帝之親賢遠佞不假貴戚  
而力行 先帝之割私任公戒飭邊備常若 先帝之不忘平  
夷虜節省財費常若 先帝之不忘平生靈事無巨細無內外

惟倣先帝所已行者而力行之則大孝之實通乎天下矣曰  
集羣議以決大政大略謂陛下嗣大歷服之初繼體守成之  
時夫何近來旨由中出內閣之所議擬者徑行改易所當謀  
猷者悉不預聞伏願上念祖宗創業之至難陛下負託之  
至重延接大臣講求治理事無大小悉從議擬日召內閣預聞  
施行務得政令之大體務合人心之大公其次曰改州治以奉  
陵寢崇儉德以裕財用省虛費以甦民困增貢舉以進人才修武  
備以禦寇盜省匠役以甦民困節工役以省財用清吏役以革  
宿弊清馬政以防欺蔽大優容以廣言路雖集衆論之長而裁  
製多出其筆言皆剴切無忌士論韙之然權姦自是側目矣二

年逆瑾亂政素嫉其正直值南京科道官言事被逮獨往送贖以俸金且議上章直之瑾聞愈銜之勒令科道招詞連瀚同黨乃矯詔降浙江右叅政致仕聞命卽行怡然自得後瑾復矯詔指與大學士劉健謝遷尚書劉大夏韓文都御史張敷華等爲朋黨頒示天下瑾伏誅御史凌相等交章謂瀚德尊望重有經濟之宏規不宜置散地詔復尚書仍致仕卒贈太子太保謚文安瀚學問淵委識邃而養充休休焉至方若員至勇若怯溫煥若可親而居中栗不可柔有廣平之介而不失之狹有萊公之大而不失之踈尚書姚鏌謂其言孝廟時有韓范之遇家政輯睦子孫醇謹有萬石君之口鄉里風動郡國有陽城晉

鄙之化麗眉皓首鄉人具瞻有文潞公洛社之望焉憲副陳伯獻謂賤者卽之不知其爲貴平者卽之不知其爲尊愚不肖者卽之不知其爲賢且智獨非意相于者卽之始知其凜然不可犯人皆以爲名言子廷梈官至太子太保工部尚書廷機并子嫌爲父子翰林其德厚之報云

何鑑字世光浙江紹興府新昌縣人成化己丑進士庚寅出知宜興縣以政績卓異聞甲午召陞山西道監察御史丙申奉

勅會給事中唐章查盤邊儲論黜監司以下不職數十人連劾巡撫停俸餘皆置之法邊境肅然戊戌差巡京倉首禁需索逮捕總督太監等麾卒置於法總督怒構棗廠下鑑錦衣衛獄竟亦

不能害已亥巡歷廬鳳淮陽等處辛丑權河南知府禁發商周

漢唐塚墓甲辰乙巳丙午河南山陝連值凶歲餓殍流徙相屬

條陳救荒禦災十事具申鎮巡皆奏聞多見施行丁未陞山

東左叅政庚戌陞四川布政司右布政使壬子轉本司左布政

使癸丑陞都察院右副都御史總理江南糧儲巡撫其地兼理

浙江嘉湖杭三府稅糧鑑訪寃弊源以次興革甲寅奉勅同

侍郎徐貫游吳淞白茅等港費無所出乃請以兌軍諸費充焉

又以治其地卽役其地之人分地程工賦糧使官賴民之力民

賴官之濟用米二十八萬石人二十五萬衆不以爲勞費不旬

月厥功告成乙卯丁父憂丁巳服闋起巡撫山東己未陞刑部

右侍郎命訊周藩大獄復

命稱旨賜羊酒竇格陞本部左

侍郎辛酉秋奉勅同三法司審錄罪囚賜羊酒冬十一月山

東兗州等府直隸徐邳等州大旱奉勅便宜賑濟首陳五事

悉報可時巨盜弄兵亟命有司賑濟饑民招撫流亡牛具種穀

區畫備至壬戌丁母憂乙丑服闋適戶部獻民數孝廟按圖

數戶以爲當今生齒繁盛戶口宜盈而虧宜登而耗一命簡大

臣考覈廷舉鑑以刑部左侍郎兼都察院左僉都御史清查河

南湖陝三省鑑乃刊條檄中詳勅旨二十餘事俾三省各知

遵守自河之南江之北漢之左有窮鄉險道無不躬親巡歷仍

奏委三省藩臬分方任職以督厥成於是三省計清過流移逃亡

戶四十萬有奇丁口百萬入編籍者戶二十三萬五千六百丁口七十三萬九千六百口事而還 賜羊酒寶鈔因疏處置地方十事以聞復陳途中所見軍民利病六事奏禪新政秋七月奉 勅會同三法司慮囚賜羊酒丁卯春陞南京兵部尚書叅贊機務時逆瑾擅權內外諸守權貴皆出門下鑑毅然不顧請託不行權貴惟命戊辰南京大饑瑾幸國災不允賑濟且勅南京運米三十萬石轉卹鳳陽鑑以留都地方重於鳳陽災傷甚於淮西會同內外守備直言辨奏始得停運及差官賑濟已而瑾凶焰益熾附之者紛然惟恐或後未嘗與之一通訊問及刑部都察院長員缺廷論三薦之瑾終不用其黨錦衣衛千戶



張文冕者鑑先巡撫松時以詐僞事捕置於法後亡匿附瑾朝夕煽禍無所不至竟誣松江官布事於瑾罰米七百石原籍上納慨然膏產完之繼又控閭里修造事罰米一千石寧夏上納鑑計無所充戶部隨爲乞恩寬宥上特命蠲之庚午八月逆瑾文冕伏誅辛未春正月特召爲刑部尚書詳兵部柴昇字公照河南南陽府內鄉縣人十五補郡庠生歆粥讀書寒暑靡廢受知郡守段堅成化丁酉舉於鄉丁未始舉進士是年選擢工科歷左右都給事中特爲孝廟眷注調兵科歷十有三年在諫垣以死直爲心計官祿非夙志也弘治庚戌薨見東井請詔求言首疏十有五事急切時弊上首爲嘉納卒

亥圻民山東河南水旱流移 詔亟求時政得失疏行四事甲

寅工部營造 皇親府第人心怨詛劾之疏留中 詔用以寢

乙卯四川番僧領真占竹黃緣行取中外騷動禮部劾科道又

劾 上不聽乃徐草一疏反覆乎孟軻韓愈文義忠愛疊疊千

萬言 上讀之大悟詔用中止天下誦之丁巳內艱起復掌兵

科適大同虜逼 上意欲南封駁發指昇任以身平江伯陳銳

將兵百萬老師蠶食奮筆舉劾衆色懼明日奉 詔取回褊裨

而下各置以法他如革畫工止僧度省柴夫至今著爲令辛酉

陞山東叅政奉 勅督糧巡歷所至查革奸弊興學視農水旱

租稅已經奏復而戶部邊警檄徵昇部運至京米麥草束原價

糴糶不足部檄增若干又徵解京又不足巡撫檄借官庫銀谷  
又增若干又不足具論民無餘力可以再徵庫無餘財可以再  
借論入得暫收原價宣府龍門喜峰古北口諸倉亦各被區處  
官吏稱便乙丑陞廣東右布政革缺官皂隸銀貯之公庫稽其  
出入人服其廉時十三村賊與良善雜處議難進兵撫鎮授之  
乃設法招諭俘獲罔寃貨財婦女惴載捷聞 賜銀牌紵絲衣  
二襲舟還荆襄行李蕭然途人興歎正德丙寅轉山東左布政  
丁卯陞右副都御史巡撫江西會革改陝西振肅憲度以綱以  
紀聞者凜凜時革總制三邊一聽於昇令行禁止終任雖厠舍  
器物一以給官三年陞吏部右侍郎四年轉左嘗謂家宰正百

官均四海正已而已自効求去奉

旨慰留庚午冢宰逮繫攝

部事以傷國體壞選法者督屬攜撫手自省閱議請釐正法比  
畫一本年陞南京禮部尚書六年改南京兵部 勅叅贊機務

議陳兩都形勝粵自

祖宗朝迄今百數十年設官遠有意義

奈何承平既久百度寢衰加以內府冗員四方饑盜歷數漢唐  
宋往迹要以救時弊收人心爲急務條十有三事率祛逆瑾餘  
孽具見施行自是不悅者滋衆繼以賊勢猖獗疏保國之策

上遂以守備事悉委之竭心力會選官軍分布據守盜隨以息坐  
是病目乞休得 旨褒留壬申外艱繳勅奔喪中途乃南京戒  
嚴僉議以奪情例檄差官遮留乃謂奪情其令典耶就檄答之

東歸乙亥吏部以南京工部起固辭乃允詳南京工部

劉機字世衡號省齋順天府大興縣人戶部尚書中敷之孫光祿寺卿璉之子長身玉立爲詩文不事彫琢成化戊戌第進士改翰林庶吉士檢討弘治乙酉轉修撰憲廟實錄成進侍講經筵武宗出閣轉侍讀學士日侍經筵講讀十三年會典成遷學士十六年進少詹事兼學士充日講進禮部右侍郎尋轉左兼學士管內閣誥勅兼實錄副總裁正德二年陞禮部尚書尋加太子少保三年逆瑾擅制設內閣一員專管誥勅仍命管誥勅實欲引爲入相地五年瑾伏誅吏部尚書張綏以同謀下獄死機管內臣魏彬等改吏部機生長都城員活不羈

與閣登綢繆日深請託賄求如水決防不能砥止於銓選條例  
設不經心衆論輕之會大學士李東陽欲用楊一清尋以人言  
致仕家居投匿名帖於禁內指摘一清等過失一清設計七年  
起南京兵部尚書叅贊機務甲戌再乞致仕疏三上給馳驛以  
歸月廩歲隸之賜視前有加機之在南京也適流賊犯江上機  
謀曰今日之事唯立主帥定賞格修營柵恤軍士爲急時李都  
督昂自貴州罷鎮還南京乃邀致之而委重焉李以未得朝  
命辭機曰朝廷勅吾輩有曰勅內該載不盡者爾等從宜區  
處此卽朝命也亟取瓦礫壩竹木爲營使軍士免暴露之苦  
發官銀七千餘兩犒軍防守有備賊不敢南皆其力也以尊

號恩進階榮祿大夫家居九年乃卒訃聞贈太子太保 命禮部論祭者四工部治塋壽七十有二

張濬字仲提廣西桂林府全州人成化戊戌進士選庶吉士授編修弘治己酉轉侍講戊午充東宮講讀官辛酉主考順天鄉試十二年進侍讀學士十八年陞學士尋遷國子祭酒正德元年擢禮部右侍郎二年轉左己巳陟南京禮部尚書本年改南京戶部六年改南京吏部尚書時世儲位久虛濬率同儕請建太子言甚剴切甲戌改南京兵部叅贊機務條陳八事又奏革守備廳冗官凡百推用不容請託人皆服其公乙亥致仕加太子少傅卒濬性剛褊與人多不合其在戶部清查遠年逋賦論者

謂劉瑾方事督責而深多附之及瑾誕日以金壽星爲獻深後極詳辯未可知也但大學士石瑄極加稱美其亦有所試云

喬宇字希大山西太原府樂平縣人成化甲辰進士丙午授禮部儀制司主事丁母憂弘治庚戌服闋除吏部文選司主事壬子署考功司員外丁巳補郎中辛酉調文選司郎中日益勤勵門無私謁凡三與考察輿論稱允至於拔進賢才杜塞僥倖屏退儉壬無不贊行之壬戌遷太常少卿八月有事南郊命導

駕齋壇正德改元命分祭中鎮霍山黃河西海媧皇商湯王陵

晉代藩諸王陵園戊辰轉光祿寺卿一歲陞戶部右侍郎庚午遷左侍郎辛未轉南京禮部尚書乙亥改南京兵部尚書叅贊



機務治尚簡靜說者謂得畢公保釐之道時番國烏思藏傳聞國西有童子記其前生事者以爲活佛上遣使迎之上疏極論其事甚傷國體且云國朝祖宗相承所以不絕番僧朝貢者不過羈縻遠夷而已非崇奉信惑之也陛下天縱聖明無微不燭抑豈不知西方異端佛教無益中國之治乎南京御史林有年以言事被逮宇論抹得釋上巡遊無時宣大之地往來數矣又復事於關陝以伐虜爲名乃上言天命人心累數自言無不剴切是時前星未耀疏乞早建皇儲以安定宗社俱不報已卯宸濠之變濠與留守太監劉珣交通欲取南京宇廉得其實卽偵誅其往來者并制珣不與同事多執間諜

以梟江岸濠計頗沮至安慶爲守備楊銳敗之濠怒曰安慶一  
鼓爾尚如此况南京乎且聞喬尚書甚有備將如何也乃殺方  
士數十人謀退兵是夜西北風惡甚舟纜盡絕比曉至鄱陽湖  
遂爲都御史王守仁乘之不戰而敗先是宇視機務時密得濠  
反狀又知指揮銳有才略可用廼署爲安慶守備誠之曰安慶  
南京上游密邇江西賊計汝必先知知則速來告之賊至必先  
攻安慶攻則汝死守之未幾賊變銳果能成其功十二月 上  
南狩至則叛逆已平遂受 朝正於行在初有 旨命百官以  
戎服朝見宇獨以爲兩京禮儀一體豈容有異遂朝服率諸臣  
見時江彬怙權籠勢焰傾人統邊軍數萬扈從屯處京城有不

軌心宇以雅量鎮服其邪彬始亦欲搆宇使人攬撫其事卒無  
所得一日晚遣兵官索各城鎖鑰城中驚駭不知所出督府遣  
人來謀於宇宇曰守備所以謹非常城門鎖鑰孰敢索亦孰敢  
與者雖 天子詔奈何督府以宇言拒之竟寢城中帖然彬每  
假傳旨有所求爲日數十通宇每得 旨必請而奏彬計遂不  
行鎮安都城隱然虎豹在山之勢及駐蹕旣久倡九卿臺諫凡  
上三章勸回 鑾輿以安社稷爲計九月 上還京師扈從至  
揚州歸辛丑五月考績錄前功加柱國少保太子太保七月召  
拜吏部尚書詳吏部

王守仁字伯安浙江紹興府餘姚縣人父華成化辛丑狀元

至南京吏部尚書封新建伯母鄭氏孕十四月而生將誕之夕  
祖母岑氏夢天仙抱一赤子乘雲而來導以天樂至屋簷呼岑  
與之岑失手墮地蹶不能啼岑以生氣噓口少頃而啼岑驚寤  
卽其初誕啼聲旣誕果蹶少頃岑以生氣噓之而甦鄭自乳之  
忽乳竭夢神女爲乳乳遂溢父華以夢雲之祥故名之曰雲生  
六歲不能言一日出戲於門有老僧過以手摩其頂曰有此寧  
馨兒却被名字叫壞了鄭語華改今名遂能言而穎異頓發年  
十一大父携之上京過金山作詩曰金山一點大如拳打破維  
揚水底天醉倚妙高臺上月玉簫吹徹洞龍眠已而從塾師讀  
書出游市上與鬻雀者爭有相者見而異之以錢買其雀與之

送歸書館謂塾師曰此子他日官至極品當立異等功名因遍閱同館諸小生第其官階崇卑顯晦後皆悉驗年十三父爲會試考官隨入試場卽能閱卷評品高下皆當性豪邁不羈喜任俠畿內有石英王勇之亂久不能撲欲以計令俠侶往擒之又湖廣有石和尚劉千斤之亂輒爲書欲獻於朝請往征之父華皆力止之年十七至江西成壻於外舅養和諸公官舍明年謁一齋婁先生異其質語以所當學而又期以聖人爲可學而至由此遂毅然有學爲聖人之志然任俠之氣未能遽除弘治壬子年二十一中浙江鄉試會試二科不第乃學兵往塞外觀山川學騎射已未登進士第觀政工部乃與太原喬宇廣信汪

俊河南李夢陽何景明姑蘇顧璘徐禎卿山東邊貢諸公以才  
名爭馳騁學古詩文 欽差督造威寧伯王越墳於河間造墳  
役夫二以什伍之法馭之暇卽以役夫演八陣圖識者已知其  
有遠志少日嘗夢威寧伯授以寶劔及旣竣事威寧家以金幣  
爲謝辭不受乃出威寧軍中佩劔贈之適符其夢祥有彗星及  
韃虜猖獗上疏論邊務因言朝政之失辭極剴切明年授刑部  
主事差往淮甸審囚多所平反復命回部日事案牘夜歸必燃  
燈讀五經及先秦兩漢書爲文字益工父恐過勞成疾禁家人  
不許置燈書室乃潛置俟父寢又燃讀必至夜分因得嘔血疾  
告養病歸越卽陽明洞舊觀墓闢爲書屋覓神仙踪跡及究仙

經秘肯靜坐習導氣爲長生久視之道靜坐久能預知時坐洞  
中其友王思格等四人欲訪之方出門守仁已知卽命僕出山  
買果肴候之且歷語其來跡僕遇四人於途語之悉合皆驚異  
以爲得道遂師事之甲子聘爲山東鄉試考官而山東之士凡  
爲海內所稱重者皆其所取士也復授兵部武庫司主事明年  
白沙陳先生高弟甘泉湛若水始爲翰林院庶吉士一會定交  
共爲聖學明年丙寅正德改元宦官劉瑾竊國柄作威福差官  
校至南京拏給事中戴銑等下獄上疏乞宥之瑾怒矯詔廷  
杖五十斃而復甦謫貴州龍場驛驛丞瑾怒猶未釋守仁行至  
錢塘度或不免乃託爲投江潛入武夷山中決意遠遯學道祈

不得道不復出山遇夜至一山憇投宿不納行半里許見一古  
廟四壁俱頽時夜深遂據香案而卧黎明道士往視之熟睡案  
上乃推醒曰汝異人也此乃虎狼之穴汝何得無恙因詰其出  
處乃詐爲商人道士曰視汝丰神決非商人若非得道之流決  
是廟廊清貴守仁乃吐實道士曰如汝所志將來必有赤族之  
禍因問何以至此道人曰汝既有名朝野若果由此匿跡將來  
禍發奸徒必假名以鼓舞人心 朝廷必尋究汝家豈不致赤  
族之禍守仁深然其言嘗有詩云海上曾爲滄水使山中又拜  
武夷君遂由武夷至廣信泝彭蠡歷沅湘至貴陽龍場始至無  
屋可居爰於叢棘間遷於東峰就石穴而居夷俗以蠻語爲事



凡中土人至必下蠱殺之及欲蠱守仁卜諸蠱神不協於是龍  
場之民日來親狎以所居陰濕不可久乃相與伐木爲驛樓及  
屋乃扁爲何陋軒君子亭賓陽堂玩易窩以居之龍場在萬山  
中書篋不可攜止偕二僕以往諸僕歷險冒瘴皆病守仁日夕  
躬爲湯糜調護之瑾欲害之意未已守仁於一切得失榮辱之  
景皆能超脫惟生死一念尚不能遣於心乃爲石櫛自誓曰吾  
今惟俟命有死而已他復何計日夜端居默坐澄心精慮以求  
諸湛一之中一夕忽大寤終夜不寐踴躍若狂者兩日夜嗣後  
以所記憶五經之言證之一一相契獨與晦菴註疏若相牴牾  
恒往來於心因著五經臆說時元山席書官貴陽聞其言論議

有自知其所學之非至有誑已誑人之說廼自信曰晦翁亦已  
自悔矣日與學者講究體察愈益精明而從游者衆時思州守  
遣人至龍場稍侮慢守仁諸役夫咸憤惋輒相與毆辱之守大  
怒白憲副毛公科令守仁請謝且喻以禍福利害守仁致書以  
忠信禮義爲解守遂釋然愈敬重之安宜慰初聞名使人餽米  
肉給使令辭不受既又重以金帛鞍馬復固辭不受及議減驛  
事則力折之且申說 朝廷威信令甲其議遂寢已而獮酋有  
阿賈阿札者時出入剽掠爲地方患復以書詆諷之安悚然操  
切其所部民賴以寧庚午陞廬陵知縣乃稽國初舊制慎選里  
正三老委以詞訟坐視其成圉圉清靜是歲冬以朝 覲入京

陞南京刑部主事館於大興隆寺僧房與湛若水黃綰訂申共  
學之盟後湛若水謀於白巖喬宇轉告冢宰遂菴楊一清留北  
曹乃擢爲吏部驗封主事未幾爲會試考官陞文選員外郎繼  
陞考功郎中而學益不懈士大夫之有志者皆相率從游明年  
癸酉陞南京太僕寺少卿從游者日益衆甲戌陞南京鴻臚寺  
卿始專以良知之旨訓學者聞迎佛骨爲疏欲納約自牖勸爲  
聖學不果上明年丙子十月陞都察院左僉都御史撫鎮南贛  
汀漳等處先是南贛撫鎮屢用非人山谷兇民初爲偷竊攘奪  
以至聚徒爲盜漸至擄掠鄉村焚掠州縣肆無忌憚遠近視效  
凡在虔楚閩廣接壤山谷無非賊巢小大有司束手無策皆謂

終不可理兵部尚書王瓊獨知之特薦而用之至南頓先嚴戰禦之法時龍南賊二千餘突至信豐又糾合廣東龍川泃頭諸賊酋分隊以進勢甚猖獗守仁於未戰之先令兵備官調兵斷賊歸路及委官統領前後夾擊之又曰此賊既離巢穴利在速戰又令乘險設伏厚集以待各鄉村往來路徑多張疑兵使進無所獲退無所據不過旬日可以坐擒一違節制當以軍法從事先時在官吏書皂隸及在城軍人陰陽占卜皆與賊通日在官府左右訶覘不惟言出於口賊必先知凡意向顏色之間賊亦知之守仁知其然意欲在此則示之以彼欲在彼則示之以此每令陰陽擇日者占卜或擇卜已吉而不用或欲用而中止

每勵兵蓐食令俟期而發兵竟不出賊各依險自固四路設伏  
乃潛令三省兵備官各率兵從徑道與賊交鋒前後大戰數合  
擒斬首俘獲無算餘黨奔聚象湖山拒守又密諭令佯言犒軍  
退師俟秋再舉密探虛實乘賊懈弛因新陞廣東布政使邵蓄  
與同鄉將之任劄發兵護送乘此會選精兵一千五百當先重  
兵四千二百繼後軍約已定令送邵布政刻期還日度夜半至  
欲征賊巢山下乃潛率十數騎亦至密使人招之前來令分作  
三路於夜半啣枚直趨象湖山搗其巢穴我兵奪據隘口賊猶  
不知各賊雖失險其間賊徒類皆驍悍猶能凌絕谷超距如飛  
復據上層峻險四面飛打滾木礮石以死拒敵我兵奮勇鏖戰

自辰至午三省所發奇兵從間道鼓噪突登始驚潰大敗我兵  
乘勝追殺擒斬俘獲賊屬又無筭墜崖壑而死者亦不可勝計  
餘黨復入流恩山岡等巢與諸賊合勢明日復戰又不利遂入  
廣東界上黃蠟樟溪大山又賊酋詹師富等恃居可塘洞山寨  
聚糧守險勢甚強固乃命分兵五路攻擊追襲與賊連戰又令  
知府鍾湘攻破長富村等處巢穴二十餘處擒斬俘獲益多其  
脇從餘黨悉願携帶家口出官投首聽撫安插守仁聽令委官  
招撫脇從諸賊安插復業四千餘人又令兵備僉事顧應祥等  
委官統領軍兵會同福建刻期追剿揚言班師出其不意從牛  
皮石嶺脚隘等處分爲三哨鼓噪並進賊瞻顧不暇望風瓦解

攻破古林柘林白吐村赤口岩等巢直搗箭灌及攻破水竹大  
重坑苦宅溪清泉溪白羅南山等巢直搗洋竹洞三角湖等處  
前後大戰十餘合俘獲四千餘人有奇牛馬貨物無筭嘗上疏  
申明賞罰以勵人心因請 勅便宜行事及請令旗令牌不報  
是時大庾南康上游三縣峯賊各發擄掠居民又廣東潮頭等  
處強賊池大鬚等三千餘徒突來攻圍南康縣殺損官兵與湖  
廣桂陽及廣西樂昌等縣巢穴相聯盤據流劫三省於時兵備  
等官請調三省狼達等兵與官兵夾勦守仁又上疏論狼兵所  
過不減於盜轉輸之苦重困於民仍請便宜行事期於成功不  
限以時則兵衆旣練號令旣明人知激勸事無掣肘可以伸縮

自由相機而動日剪月削可使漸盡灰滅復疏請設添清平縣  
治及疏通鹽法以足兵食湖廣巡撫都御史秦金奏請夾勦疏  
下復上議處兵糧事宜是歲六月召知府季敦縣丞舒富等密  
授方略領兵分勦生擒酋賊陳曰能等搗其巢穴俘獲賊黨無  
筭又上疏論三省交勦方略先是屢請 勅便宜行事衆皆笑  
爲迂故屢不報惟尚書王瓊慨然曰 朝廷此等權柄不與此  
等人用又與誰用我必與之故因守仁疏覆議奉 旨改提督  
南贛汀漳等處軍務換賜 勅書及前所請旗牌便宜行事俱  
得報可 廷議以其前攻破長富村象湖山可塘洞諸處擒斬  
首從賊級數多仍降 勅獎勵陞俸一級賞銀二十兩紵絲二



表裏時汀州左溪賊酋藍天鳳與贛南上新穩下等洞賊酋雷鳴聰高文輝等相結盤據千里荼毒三省乃與諸從事議曰諸巢爲患雖同事勢各異以湖廣言之則桶岡諸巢爲賊之咽喉而橫水左溪諸巢爲之腹心以江西言之則橫水左溪諸巢爲賊之腹心而桶岡諸巢爲之羽翼今不先去橫水左溪腹心之患而欲與湖廣夾攻桶岡進兵兩寇之間腹背受敵勢必不利今我出其不意進兵速擊可以得志已被橫水左溪移兵而臨桶岡勢如破竹矣議旣決乃命各官等帥兵由各道以入指揮郊文帥兵千餘自大庾縣義安入知府唐淳帥兵千餘自大庾縣聶都入知府李敷帥兵千餘自大庾縣穩下入縣丞舒富帥

兵千餘自上猶縣金坑入守仁親帥兵千餘自南康進屯至坪期直搗橫水以與諸軍會又使兵備副使楊璋分守叅議黃宏監督各營官兵往來給餉以促其後是月初七日各哨齊發初十旦進兵至坪會間諜訶知各險隘皆設有滾木礮石守仁度此時賊已據險勢未可進自率兵乘夜遂進未至賊巢三十里止舍使人伐木立柵開塹設堠示以久屯之形復遣官分帥鄉兵及樵豎善登山者四百人各與旗齋銃砲鈎鏃使由間道攀崖懸壁而上分列遠近極高山嶺以覘賊張立旗幟藝茅爲數千竈度我兵且至險則舉砲燃火相應十二日黎明兵進至十八面隘賊方據險迎敵驟聞遠近山嶺砲聲如雷煙焰四起我

兵復呼哨分逼銃箭齊發賊皆驚潰失措以爲官兵盡破其巢穴遂棄險退走又預遣千戶陳偉高霄分率壯士數千緣崖上奪賊險盡發其滾木礮石我兵乘勝驟進指揮謝景馬廷瑞兵由間道先入悉焚賊巢退無所據乃大敗奔潰橫水旣破乘勝進攻左溪擒斬首級無數俘獲男婦牛馬什物不可勝算會霧雨連日令休兵犒勞是月二十七日官兵乘勝進攻桶岡復議桶岡天險四面青壁萬仞中盤百餘里連峰參天深林絕谷不覩日月因詢訪鄉導賊所由入惟鎖匙龍葫蘆洞茶坑十八磊新地五處皆假棧梯壑竄懸絕壁而上惟上章一路稍平然深入湖廣迂回取道半月始至乃令移屯近地休兵養銳振揚威

聲先使人諭以禍福彼必懼請服其或有所不從者乘其猶豫襲而擊之乃可以逞使人招撫并縱所獲桶岡賊鍾景綰入賊營期以翼日早使人於鎖匙龍受降賊方甚恐集衆會議乃遣縣丞舒富帥百人屯鎖匙龍促使出降而使知府邢珣入茶坑伍文定入西山界唐淳入十八磊知縣張戢入葫蘿洞皆於是月晦日乘夜各至分地遇大雨不得進明早冒雨疾登賊首藍天鳳方就鎖匙龍聚議聞各兵已入險皆驚愕散亂猶驅其衆男婦千餘人據內監絕險隔水爲陣以拒我兵渡水前擊復分部左右夾攻賊不能支且戰且却及午雨霽各兵鼓奮而前賊乃敗走桶岡諸巢遂皆悉平守仁以暇各相視形勢據險之隘

議以其地請建縣治控制三省諸徭斷其往來之路又進兵攻  
穩下諸坑等巢又皆悉平又以湖廣二省之兵方合雖近境之  
賊悉以掃蕩而四遠奔突之虞難保必無乃留兵四千餘分屯  
茶遼諸隘餘兵回頗近縣休息疲勞俟二省夾攻盡絕然後班  
師守仁驅卒不過萬餘用費不滿三萬兩月之間俘斬六千有  
奇破巢八十有四渠魁賊首噍類無遺又疏請三縣適中之處  
立安義縣移置小溪驛於大庾縣城內使督兵防遏洴頭賊酋  
池大鬚等聞橫水諸巢皆破始懼加兵乃遣其弟池仲安等率  
老弱二百餘徒步赴軍門投降求隨衆立效意在緩兵因而窺  
覘虛實乘間內應守仁逆知其謀乃佯許之及進攻桶岡使領

其衆截路於上新地以遠其歸途十月池大鬚等聞復破柵岡  
益懼爲戰守備守仁使人至賊所賜各酋長牛酒以察其變賊  
度不可隱詐稱龍川新民盧珂等將掩襲之是以密爲之防非  
虞官兵也守仁亦陽信其言因復陽怒盧珂等擅兵仇殺移檄  
龍川使廉其實且趣伐木開道將回兵湍頭取道往征之賊聞  
之且喜且懼有盧珂鄭志高陳英者皆龍川舊招新民有衆三  
千餘皆爲池大鬚所脅而三人者獨深忌之乃來告變云大鬚  
僭號設官及以僞授盧珂等金龍霸王官爵印信來首守仁先  
已謀知其事乃復陽怒不信遂械繫盧珂而使人密諭以陽怒  
之意珂遂遣人歸集其衆待時而發又使人往諭池大鬚且密

購其所親信頭目二十人陰說之同部下百八十人自來投訴  
守仁還贛乃張樂大亨將士下令城中散兵使各歸農示不復  
用賊衆皆喜遂弛其備池大鬻乃謂其衆曰若要伸先用屈贛  
州伎倆亦須親往勘破遂率其麾下四十人自詣贛守仁使人  
探知池大鬻已就道乃密遣人先行屬縣勒兵分哨道候報而  
發又使人督集盧珂等兵俱至而令所屬官僚以次設酒羊日  
犒池大鬻等以緩其歸會正旦拜節又明日復設犒於庭先伏  
甲士引池大鬻入并其黨悉擒之出盧珂等所告狀訊鞠皆伏  
遂寘於獄皆斬之夜使人趨發屬縣兵期以初七日同時入巢  
諸兵皆從各徑道以入守仁自率帳下官兵從龍南縣冷水巡

直搗下泃大巢與各哨兵會於三泃先是賊徒得池大譽報謂  
潁州兵已罷歸皆已弛備散處各巢至是驟聞官兵四路並進  
皆驚懼分投出禦悉其精銳千餘衆據險設伏併勢迎敵於龍  
子嶺我兵聚爲三衝犄角而前大戰良久賊敗復奮擊數十合  
遂克上中下三泃各哨官兵遙聞三泃大巢已破皆鼓勇齊進  
各賊皆潰散遂進攻九連山於是選精銳兵七百人皆衣所得  
賊衣佯若奔潰者乘暮直衝賊所據崖下澗道而過賊以爲各  
巢敗散之黨皆從崖下招呼我兵亦佯與呼應賊疑不敢擊已  
度險遂扼斷其後路次日賊始知爲我兵并勢衝敵我兵已據  
險從上下擊賊不能支守仁度其必潰預令各哨官兵四路設



伏以待賊果分隊潛遯皆邀擊而悉俘之前後擒斬首級無算  
俘獲男婦牛馬器仗什物不可勝計餘黨張仲金等二百餘人  
多係老弱及遠近村寨一時爲賊所驅從惡未久之人勢窮計  
迫聚於九連谷口呼號痛哭誠心投招乃遣官驗實皆量加責  
治遣知府邢珣往撫其衆籍其名數悉安插於白沙遂親相視  
險易經理立縣設監可以久安長治之策留兵防守而歸贛人  
皆首戴香爐遮道而迎爲立生祠又家肖像而歲時祭禱守仁  
疏乞休致不允又以龍川諸處係山林險阻之所盜賊屯聚之  
鄉當四縣交界之隙乃三省間餘之地政教不及人迹罕到其  
間接連閩廣反覆賊巢動以百數據而守之真足爲諸賊之往

來杜奸宄之潛匿遂疏請於和平地方建設和平縣治以扼其要害又以大賊酋龔福全高仲仁李斌吳訊等邀路劫殺軍民攻掠郡縣命三省將官征勦克平乃上三省夾勦捷音疏朝  
廷陞右副都御史蔭子一人錦衣衛世襲百戶賜勅獎勵隨  
因奏報平定廣東韶州府樂昌縣等賊捷音查河加陞本衛世  
襲副千戶守仁在贛雖軍旅擾擾四方從游日衆而講學不廢  
褒崇象山陸子之後以扶正學贛人初與賊通性多鄙野乃爲  
立保甲十家牌法於是作業出入皆有紀又行鄉約教勸禮讓  
又親書教誡四章使之家諭戶曉而贛俗不變贛人多爲良善  
而問學君子亦多矣十四年正月再疏乞放歸田里當路輔臣

素思之欲從其請兵部王瓊逆知宸濠必將爲變一日召其屬本部主事應興曰我冀王某於江西與之便宜行事者不但爲溪洞諸賊而已今溪洞已靖萬一或有他變若無便宜行事勅書旗牌將何施用時福建有軍人進貴等之變王公曰此小事不足煩王某但假此便宜勅書在彼手中以待他變爾可爲我做一題稿來看稿成具題降一勅與守仁曰福州三衛軍人進貴等惑衆謀反特命爾暫去彼處地方會同查議處置叅奏定奪時宸濠陰謀不軌亦已有年一月令安福舉人劉養正往說守仁云寧王尊師重道有湯武之資欲從公講明正學守仁笑曰殿下能舍去王爵否既而令門人龔元亨先往與宸濠講

學以探其誠否元亨至語矛盾宸濠怒遣還密使人殺元亨於途不果於是守仁於六月初九日自贛起行欲往福建勘事十五日至豐城縣界先有典史鄧人來報宸濠反狀繼而知縣顧佻來具言其詳守仁度孤倉卒兵方未集難卽勤王亟欲遡流趨吉安府可以師兵觀其動靜以圖萬全時正夏南風方盛欲南至吉安則風逆聞宸濠亦發千餘人來迎守仁欲發舟舟人畏不敢發以逆流無風爲辭守仁乃密禱於舟中且誓死圖報國無何而北風大作舟人猶不可行乃拔劍誅其耳遂發舟薄暮度勢不可行乃潛覓小漁船以微服作縉夫下船急去留麾下一人服冠服在舟中已而宸濠兵果犯舟而守仁不在欲

殺其代者或曰殺之何益隨捨之追不及是夜舟至臨江知府戴德孺聞守仁至喜甚留入城調度守仁曰臨江居大江之濱與省城相近且當道路之衝莫若抵吉安爲宜又以三策籌之曰宸濠若出上策直趨京師出其不意則宗社危矣若出中策則趨南都大江南北亦被其害若出下策但據江西省城則勤王之事尚易爲也及行至中途恐其速出乃爲計謀奉朝廷密旨先知寧府將反行令兩廣湖襄都御史楊旦秦金及兩京兵部各奉密旨命將出臨暗伏要害地方以俟寧府兵至襲殺復取僞人數輩各與數百金以全其家令其至伏兵處所飛報竊發日期將公文各縫置藏於袷衣絮中將發間又捕捉僞

太師李士實家屬至舟尾令其覘之卽佯怒令牽上岸處斬已  
故縱之令其奔報宸濠邏獲優人果於袷衣絮中搜得公文遂  
疑不敢卽發十八日至吉安知府伍文定出迎甚喜軍民皆遮  
道呼號遂入城撫慰軍民兩上疏飛報宸濠於是月十四日謀  
反擄殺都御史孫燧副使許逵并執縛巡按與都布按三司官  
及府縣等衙門大小官員不從者俱囚之盡收在城各衙門印  
信及搬搶各庫藏一空釋放在城各府州縣見監重囚舟楫蔽  
江而下聲言直取南京又差儀賓校尉人等持檄至各府州縣  
曉諭收取印信驅截水兌糧船請命將征討以解東南倒懸奏  
至尚書王瓊揚言於朝曰王某在南贛必能擒之不久當有

捷報至但朝廷不命將出師則無以壯其軍威時寧王畜養死士二萬招誘四方盜賊渠魁亦萬數舉事之日復驅其護衛黨與并脇從之人又六七萬霍焰張熾守仁以百數從卒退保吉安遙爲牽制之圖遠近軍民劫於宸濠積威道路以目莫敢出聲守仁督率知府伍文定戴德孺邢珣徐璉等調集軍民兵快召募四方報效義勇會計一應解留錢糧支給糧賞造作軍器戰船奏留公差回任御史謝源伍希儒分職任事約會鄉官致仕右副都御史王懋中養病編修鄒守益郎中曾直評事羅僑丁憂御史張鰲山赴部調用僉事劉藍依親進士郭持平致仕副使劉遜叅政黃繡閑住知府劉昭等相與激勸忠義曉諭

禍福又恐宸濠知其調度覺其間諜之謀發兵順江進討又密使僞國師劉養正家屬及平日與濠往來鄉官致陰附之意以緩其出直俟調度已定乃移檄遠近宣布 朝廷仁德暴露宸濠罪惡於是宸濠始覺爲守仁所欺亟欲引兵而出守仁度兵家決勝之道急衝其鋒攻其有備皆非計之得我姑示以自守不出之形必俟其出然後尾而圖之先復省城以搗其巢穴彼聞必回兵來援我則出兵邀而擊之此全勝之策也宸濠果使人探知未出乃先發兵出次南康九江諸處猶自居省城以俟禦至七月初二日宸濠又使人探知守仁兵不出乃留兵萬餘屬其腹心宗室及儀賓內官并僞都督都指揮等官使守江西



省城自乃引兵向安慶守仁又令人探知其出遂星馳促各府  
兵期以本月十五日會於臨江樟樹鎮身督伍文定等兵徑下  
於是知府戴德孺引兵自臨江來知府徐璉引兵自袁州來知  
府邢珣引兵自贛州來通判胡堯元童琦引兵自瑞州來通判  
談儲推官王暉徐文英縣李美太和知縣李楫寧都知  
縣王天與萬安知縣王以兵來赴十八日遂至豐城分  
布關道使知府伍文定爲一哨攻廣潤門入知府邢珣爲二哨  
攻順化門入知府徐璉攻惠民門入知府戴德孺攻永和門入  
通判胡堯元童琦攻章江門入知縣李美攻德勝門入都指揮  
余恩攻進賢門入通判談儲推官王暉知縣李楫王天與王冕

等各以其兵乘七門之數從傍來擊以佐其勢是日又探得宸濠伏兵千餘於新舊墳廠以備省城之援乃遣奉新知縣劉守緒典史徐誠領兵四百從間道夜襲破之以揺城中十九日發市汊乃大誓各軍申布 朝廷之威再暴宸濠之惡約諸將一鼓而附城再鼓而登城三鼓而不克誅其伍四鼓不克斬其將已誓莫不切齒薄暮齊發二十日黎明各至信地先是城中爲備甚嚴滾木灰瓶火炮石弩機毒之械無不畢具及我兵已破新舊墳廠敗潰之卒皆奔告城中城中已驚懼至聞我師四面驟集皆震駭奪氣我師呼譟並進梯絙而登城中之兵皆倒戈退奔城遂破擒其居守宜春王拱祿及僞太監萬銳等千餘人

宸濠宮中眷屬縱火自焚延燒居民房屋乃令各官分道救火  
撫定居民釋散其脇從封其府庫搜出原收大小衙門印信九  
十六顆其脇從布政使胡璉叅政劉斐叅議許效廉副使唐錦  
僉事賴鳳都指揮王玘皆自投首罪守仁先上江西捷音疏仍  
分兵四路躡宸濠是時宸濠攻圍安慶未下親自督兵運土填  
塹期在必克及聞守仁兵至豐城大恐卽欲回兵僞太師李士  
實阻勸以爲必須徑往南京旣登大寶則江西自服宸濠不應  
次日遂解安慶之圍會議歸援初安慶被圍衆謂宜引兵直趨  
安慶守仁以九江南康皆已爲賊所據而南昌城中數萬之衆  
精悍亦且萬餘食貨充積我兵若抵安慶賊必回軍死鬪安慶

之兵僅僅自守必不能援我於湖中南昌之兵絕我糧道而九江南康之賊合勢撓躡而四方之援又不可望事難圖矣今我兵驟集先聲所加城中必已震懾因而并力急攻其勢必下旣破南昌賊先破膽奪氣失其本根勢必歸救則安慶之圍可解宸濠可以坐擒旣而果如所料及議所以禦之之策衆謂宜斂兵入城堅壁自守以待四方援兵守仁獨謂宜先出銳卒乘其情歸要迎掩擊一挫其鋒衆將不戰自潰所謂先人有奪人之氣攻瑕則堅者瑕矣是日撫州知府陳槐引兵亦至乃遣知府伍文定邢珣徐璉戴德孺共領精兵五千分道並進擊其不意宸濠亦先使精悍千餘人從間道欲出不意攻收省城偶遇於

其處遂交戰我兵失利報至守仁怒甚欲以軍法斬取伍文定  
邢珣戴德孺徐璉等首自欲帥兵親戰或以敵鋒交臨若卽取  
首恐兵無統領而亂俟各奮勵以圖後效明日各帥兵奮死以  
戰其兵大敗又遣都指揮余恩以兵四百往來湖上以誘致賊  
兵知府陳槐通判胡堯元童琦談儲推官王暉徐文英知縣李  
美李楫王冕王軾劉守緒劉源清等使各領兵百餘四面張疑  
設伏候伍文定等兵交然後四起合擊分布既定大賊城中軍  
民慮 宗室郡王將軍或爲內應生變親慰諭之以安其心又  
出給告示凡脇從皆不問雖嘗受賊官爵能逃歸者皆免死能  
斬賊徒歸降者皆給賞使内外居民及鄉導人等四路傳布以

解散其黨二十三日宸濠先鋒已至樵舍風帆蔽江前後數十里守仁分督各兵乘夜趨進使伍文定以正兵當其前余恩繼其後邢珣引兵繞出賊背徐璉戴德孺張兩翼以分其勢二十四日早賊兵鼓譟乘風而前逼黃家渡其氣驕甚伍文定余恩之兵佯北以致之賊爭進趨利前後不相及邢珣之兵從後橫擊直貫其中賊敗走伍文定余恩督兵乘之徐璉戴德孺合勢夾攻呼譟並起賊不知所爲遂大潰奔走十餘里擒斬二千餘級落水死者以萬數賊勢大阻引兵退八字腦賊衆稍稍遁散宸濠懼身自激勵將士賞其當先者以千金被傷者銀百兩盡發九江南康守城之兵以益師是日建昌知府曾璉引兵亦至

守仁以九江不破則湖兵終不敢越九江以援我南康不復則  
賊兵亦不敢踰南康以躡賊乃遣知府陳槐領兵四百合饒州  
知府林瑛之兵乘間以取九江知府曾瑄領兵四百合廣信知  
府周朝佐之兵乘間以取南康二十五日賊復并力盛氣挑戰  
而風勢不便我兵少却死者數十人守仁急令斬取先却者頭  
知府伍文定奮督各兵殊死並進砲及宸濠舟宸濠遂大敗擒  
斬二千餘級溺水死者莫計其數賊復退保樵舍聯舟爲方陣  
盡出其金銀以賞士卒守仁乃夜督伍文定爲火攻之具邢珣  
擊其左徐璉戴德孺出其右余恩等各分兵四伏期火發而合  
二十六日宸濠方朝羣臣拘集所執三司各官責其不致死力

戰坐觀成敗者將引出斬之爭論未決我兵已奮擊四面而集  
火及宸濠副舟衆遂奔散宸濠與妃嬪泣別宮人皆赴水死遂  
執宸濠并其母子郡王將軍儀賓及僞太師國帥元帥叅贊尚  
書都督指揮千百戶等官李士實劉養正劉吉屠欽王綸熊瓊  
盧珩羅璜丁瓚王春吳十三凌十一秦榮葛江劉勛何鏜王信  
吳國七火信等數百餘人被執脇從官太監王宏御史王金主  
事金山按察使楊璋僉事王疇潘鵬叅政程杲布政使梁辰都  
指揮郊文馬驥白昂等擒斬賊黨三千餘級落水死者約有三  
萬餘棄其衣甲器械財物與浮尸積聚橫亘若洲餘賊數百艘  
四散逃潰守仁復遣官分路追勦毋令逸入他境爲患二十七



日及之於樵舍大破之於吳城又破之擒斬復千餘級落水死者殆盡宸濠既擒衆執見守仁呼曰王先生我欲盡削護衛所有請降爲庶民可乎守仁對曰有國法在遂低首無言守仁令送至囚所行數步回向守仁曰婁妃常勸我不要爲此事是我不能聽實非其罪今死於水望先生收其屍一葬守仁曰謹領乃爲收葬婁妃之祖諒與叔祖謙皆吳康齋門人諒卽一齋婁先生故其子孫皆有祖父風如諒少子忱謙孫瑜尤知學問自立但諒長子性中成化辛丑進士喜急功利不守其家學諒嘗憂之預料必覆其宗及爲郎中以不謹考察去官不耐涼薄故以女爲宸濠妃以此凌暴鄉里忱因閉戶獨居小樓終日讀書不

下核其他子孫皆不爲惡雖性諸子止三子與同惡其他子亦皆自守故守仁於叛逆擒執之日原其有辜非辜國法止行於性子其他族屬皆不及雖性子無辜者亦縱之使逃他如李士實劉養正王春等族屬亦多原而宥之可謂行法之恕得聖賢之道矣婁氏家族有三人爲監生者持引至省城給文赴京聽選因見宸濠爲亂迴避進賢縣舟中知縣劉源清并商人數十擒而殺之劉養正舊從守仁遊至此母死未葬爲之葬又爲文祭之曰吾不敢宥汝之生以葬汝之母可謂故舊不遺情法兩盡孔明之處馬謖異世而同符也先是宸濠以賄結朝廷左右及大小遠近臣僚自輔臣以下皆有交賄實跡與往來私

書皆記手籍守仁得於其官中悉焚之其掩惡安人如此及都御史孫燧副使許逵被宸濠殺棄其屍首乃爲具木槨棺槨而歛之諭令各官屬及耆民里老人等各致祭又與委曲奏保以表其忠節皆獲卹典旣擒執宸濠并僞官李士實等將欲令人獻俘慮有餘黨沿途竊發欲親解赴闕因初在吉安兩上疏飛報乞命將出師朝廷差安邊伯朱太卽許泰爲總督軍務充總兵官平虜伯朱彬卽江彬爲提督軍務朱暉卽劉暉爲總兵等官太監張忠爲總督軍務張永爲提督盡機密軍務并體勘宸濠等反逆事情及查理庫藏宮眷等事太監魏彬爲提督等官兵部侍郎王憲爲督理糧餉往江西征討行至出途聞

宸濠已擒捷報至京計欲奪功乃密請武宗親征武宗遂自稱爲總督軍務威武大將軍總兵官後軍都督府太師鎮國公欲往江西親征在庭大臣皆力諫臣僚皆力諫不聽有被杖而死者旣而江彬許泰劉暉張忠張永魏彬等皆先領兵由大江至江西入居城中人馬填溢衢巷至不可行彼輩皆倡言誣守仁始同宸濠謀反因見天兵猝臨征討後始擒宸濠以爲功脫罪欲并擒守仁各爲已功守仁初見其兵馬之盛意有不善乃託疾不出爲餉以銀犒各京邊官軍以慰勞之有病者爲之醫藥死者爲之棺斂又親自行撫衆心皆悅及度其無可爲然後出見忠永彬泰彬輩輩彼皆設席於傍欲令守仁坐其側守

仁乃佯爲不知先坐上席令轉傍席於下請彼自坐彼乃出語  
謂之守仁以常行交際事體諭之左右皆爲守仁解遂無言蓋  
守仁非爭一坐恐一受其節制則大事之機皆將聽彼而不可  
爲故爲此爭彼乃諭以武宗皇帝將欲親征之意欲將宸濠  
放置城中待駕至與彼輩列陣重擒之以爲功守仁乃語之  
曰逆黨潛伏尚多萬一疎虞變生不測則事勢不可救矣卽欲  
將宸濠并眷屬黨與交付與彼又不可欲解見武宗皇帝彼  
又行脚止之遂託疾不出張永乃暮夜訪守仁排闥入卧內語  
以衆人欲功之意守仁乃備以盡忠爲國及募兵征勦之詳永  
始知其忠與功私與衆語其忠陰懈其謀彼乃訪守仁所原宥

婁氏家屬之類悉擒而殺之以爲功又逮捕冀元亨誣以同反  
遂各引兵至南京候 武宗守仁乃爲疏力止 聖駕親征以  
爲宸濠睥睨神器陰謀久蓄招納叛亡探輦轂之動靜日無停  
迹廣置奸細臣下之奏百不一通發謀之始逆料 大駕必將  
親征先於沿途伏有奸黨爲博浪荆軻之謀今逆不旋踵遂已  
成擒法宜解赴 闕門式昭天討欲付部下各官押解恐舊有  
潛布乘隙竊發或致意外之虞臣死有遺憾况平賊獻俘固  
國家常典亦臣子職分臣於九月十一日親自量帶官軍將宸濠  
并宮眷逆賊情重人犯督解赴 闕行至廣信聞報知疏上  
武宗不聽又聞道路傳云 欽差總督軍務威武大將軍鎮國公

朱帶領安邊伯朱太監張左都督朱提督等官司禮監魏平虜伯朱并督理糧餉兵部左侍郎王領兵將至南京欲赴江西征勦繼奉 欽差總督軍務軍門鈞帖及續准 欽差總督軍務

充總兵官安邊伯朱各差官齎手本至中途阻守仁要將所解宸濠等逆犯回至江西省城聽候會審守仁謂旣奉總督軍門鈞帖自合解赴南京面受節制若復退還江西省城坐待總督軍門駕臨恐涉遲疑且誤奏過程期又復扶疾日夜前進行至浙江杭州府又遇 欽差提督贊畫機密軍務御用監太監張永又准總督軍門鈞帖開稱宸濠等待親臨地方覆審明白具奏軍門定奪守仁因度病勢日重未愈前進旣有不能退回愈

有不可若再遲延必成兩誤乃暫留浙江館於西湖淨慈寺調治俟痊可復回江西省城案行浙江按察司轉呈 欽差提督軍務贊畫機密軍務御用監太監張請會同監察御史公同當省都布按三司等官將見解逆首宸濠及逆黨劉吉等各犯并官眷馬疋等項逐一交查明白仍請張永徑自另委相應官員兵快押帶回江西省城從宜審處未及交復上捷音以爲宸濠不軌之謀已踰一紀今旬月之間遂克堅城俘擒元惡是皆

欽差總督威德指示方略所致以此歸功總督軍門以止 武宗江西之行初守仁在江西於江彬許泰張忠諸人旣去之後卽欲將宸濠由九江安慶解至南京見 武宗皇帝思慮江彬之



徒必將復來奪俘以致踈虞遂解由廣信之浙江而江彬許泰張忠之徒又至武林要奪守仁聞知將宸濠監櫃浙江驛自詣北新關見彬忠泰等仍請浙江三司官面交付彼轉解赴闕復慮彬忠泰等害已乘夜渡江過越一見祖母岑太夫人與父海日翁泣別卽日至浙江驛欲回江西初江彬許泰張忠謀欲奪功實欲誣守仁於武宗反坐守仁爲將叛逆擒而誅之并爲已功張永知其謀又聞其與語之詳乃私語家人謀曰王都御史乃忠臣爲國今欲以此害之天理何在我若不爲一明其寃何可當也他日朝廷有事何以使臣子之忠及復命先見武宗備言其盡心爲國之忠之功且言彬等欲加害之意

既而江彬許泰張忠等果誣其無君欲叛 武宗皆不信乃謂之曰王都御史乃我家忠臣你等如何好這等說江彬許泰之計遂不行張忠因守仁在杭言不至南京見 上又言此說不信試召之必不來則可知其無君矣 武宗乃召之守仁卽奔南京龍江關將進見張忠等皆失意又從中沮之使不見守仁乃以綸巾野服入九華山欲爲道士張永聞知又力言於 武宗曰王守仁實忠臣今聞衆欲爭功并棄其官入山出家爲道士由是 武宗益信其忠守仁乃出山至江西省城視事由是江西安堵人皆深感家肖其像歲時報祀猶夫顓焉十五年閏八月四乞省葬節奉 武宗皇帝聖旨王守仁奉 命巡視福

建行至豐城一聞宸濠反叛忠憤激烈卽便倡率所在官司起  
集義兵合謀勦殺氣節可嘉已有旨着督兵討賊兼巡撫江西  
地方所奏省親事情待賊平之日來說復領巡撫江西兵殘之  
餘宗室人民凋敝之甚官府衙門居民房屋燒燬殆盡爲之賑  
卹綏勞撫定又爲奏免百姓租稅又將城中官民沒官房屋及  
宸濠違制官室與革毀一應衙門皆修改爲公廨又以宸濠占  
奪民間田地山塘房屋遵奉 詔書給還原主管理其餘照依  
時估變賣價銀入官先儘撥補兩新二縣兌軍淮安京庫折銀  
糧米及王府祿米餘羨收貯布政司官庫用備緩急是年 武  
宗晏駕 世廟登極特降聖書慰勞行取馳驛赴 闕集賞於

六月十六日奉 勅旨云爾昔能勦平亂賊安靖地方 朝廷  
新政之初特茲召用勅至爾可馳驛來京毋或稽遲於二十日  
馳驛起程爲輔臣所忌潛諷科道建言以爲 朝廷新政 武  
宗國喪資費浩繁不宜行宴賞之事行至中途而返道經錢塘  
上疏懇乞便道歸省 朝廷准令歸省陞南京兵部尚書叅贊  
機務又具疏辭免慰 旨益勤本年十二月內該部題捷音事  
乃封新建伯奉天翊衛推誠宣力守正文臣特進光祿大夫柱  
國兼南京兵部尚書叅贊機務歲支祿米一千石三代并妻二  
體追封乃累疏辭免欽 朝廷普恩賞於報效諸臣又極言舉  
人冀元亨因說宸濠反爲奸黨構陷竟死獄中以忠受禍爲賊

報仇抱冤齎恨欲盡削官職移報元亨以贖此痛先是元亨在獄又爲移咨六部申理其冤及元亨死又爲移文湖廣兩司優恤其家屬嘉靖元年丁父憂四方來游其門講學益衆科道官迎當路意首以僞學劾之服闋例該起復輔臣忌其才高望重六載不召御史石金等交章論薦皆不報禮部尚書席書爲疏特薦守仁及石淙楊一清曰生在臣前見一人曰楊一清生在臣後見一人曰王守仁時江西輔臣嘗有私憾於守仁乃密讒於上曰守仁將宸濠妃二人取歸爲妾致上疑以沮其進守仁初無子嘉靖丙戌始舉子嘉靖六年廣西思恩府土官知府岑猛之亂提督都御史姚鏌不能成功兵部侍郎張孚敬拉

禮部右侍郎桂萼同薦桂不得已勉從張薦守仁堪任此事

朝廷俞允於本年六月初六日差官持檄授總制軍務督同都御史姚鏌勘處彼中事情守仁上疏辭免請舉尚書胡世寧李承勛自代朝廷不允上與閣老楊一清曰若姚鏌不去王守仁決不肯來遂令姚鏌致仕又降旨督趨赴任時光祿寺少卿黃綰具疏論江西軍功及薦其才德堪任輔弼上喜親書御劄以疏付內閣議楊一清忌入閣與之同列乃與張孚敬議具揭帖對曰王守仁才固可用但好服古衣冠喜談新學人頗以此異之不宜入閣但可用爲兵部尚書桂公知遂大怒潛進揭帖毀之上意遂止守仁遂於九月初八日扶病起程至十

一册三十日始抵梧州蒞任代其總制四省軍務事沿途涉歷訪諸士夫詢諸行旅皆云岑猛父子固有可誅之罪然所以爲亂者皆當事諸人不能推誠撫安以致之上疏謝恩極言致亂之由平復之策十二月楊一清與吏部尚書桂萼謀恐事完常回京復命見上必留用故題命兼理巡撫又力疏辭免舉致仕都御史伍文定刑部左侍郎梁材自代不允遂兼巡撫之職進至平南地方與都御史姚鎮交代建議大約以爲進兵行勦之患十罷兵行撫之善十與夫二幸四毀之弊時布政使林富紀功御史石金皆以爲然遂至南寧府乃下令盡撤調集防守之兵數日之內解散而歸者數萬有餘湖兵數千阻道且遠

不易卽歸仍使分留南寧賓州解甲休養待間而發初思田二府目民盧蘇王受等聞守仁來知無必殺之心皆有投生之念日夜懸望惟恐至之不速旣至又見防兵盡撤其投生之念益堅乃遣其頭目黃富等十餘人於明年正月初七日先赴軍門訴告願得掃境投生守仁諭以朝廷威信及開示更生之路蘇受等旣得諭羅拜歡呼隨撤守備盡散其衆掃境來歸二十六日俱至南寧府城下分屯爲四營明日蘇受等皆囚首自縛各與其頭目數百人赴軍門投見號哀控訴且言蘇與受等久欲挺身投訴見得四方軍馬把截兼聞陰使盧蘇圖殺王受又使王受圖殺盧蘇反復難信以此連年抱苦控訴無由守仁復



諭以 朝廷恩德旣赦爾等之死寧肯誘爾至此於是下盧蘇  
王受於軍門各杖一百衆皆合辭請命乃解其縛諭以今日宥  
爾一死是 朝廷好生之仁杖爾一百乃我等人臣之義於是  
衆皆叩首悅服隨至其營撫定餘衆莫不感恩誓以死報乞殺  
賊立功以贖前罪守仁復諭以 朝廷惟願生全爾等今爾方  
來投生豈忍又驅之兵刃之下爾等逃竄日久家業傾破且宜  
速歸完爾室家修復生理至於破賊軍門自有區處不須爾等  
勦除待爾等家事稍定徐當調發於是又皆感泣歡呼守仁遂  
委布政林富總兵官張祐分投安插督令各歸復業旣而上疏  
處置平復地方以圖久安事宜仍立土官以順其情分土

散其黨設流官以制其勢猶以爲土夷之心未必盡得而窮剔  
僻壤或有隱情則又備歷田州思恩之境按行其村落而經理  
其城壁因以所處之道詢諸其長并父老子弟皆以爲善然後  
請田州仍立岑氏後爲土官知州以順夷情時設流官知府以  
制夷勢分設土官巡檢以散夷黨又以田州旣設流官宜更其  
府名爲田寧蓋取田石領田州兵田石平田州寧之謠至於思  
恩則岑濬之後已絕不必復設土官又按視斷藤峽諸處獠賊  
上連八寨下通仙臺花相諸洞連絡數十餘巢盤亘三百餘里  
彼此犄角結聚憑險流劫郡縣鄉村被害軍民累奏請兵征剿  
國初以來屢征不服乃檄叅將張經會同守巡各官集議停當於

是命潯州衛指揮馬文瑞等承順統兵宣慰彭明輔官男彭宗  
舜保靖統兵宣慰彭九省及潯州等衛指揮彭飛等各分兵布  
哨以承順土兵進勦牛場等賊巢保靖土兵進勦六寺城巢以  
四月初三日取齊抵巢先是賊酋訶知守仁住劄南寧寂無征  
勦消息又不見調兵集糧邊皆怠弛不以爲意至是突遇官兵  
四面攻圍各賊倉惶失措擒斬賊首級黨與頗多餘賊退敗復  
據仙女大山憑險結寨我兵追圍板木緣崖仰攻復大破賊寨  
乘勝復攻破油砦石壁大陂等巢餘賊奔至斷藤峽橫石江邊  
因追兵緊急爭渡覆溺死者無算并斬獲首從賊級俘獲男婦  
牛畜器械等項不可勝計仍令收兵潯州府住劄復命各官兵

移兵進勦仙臺諸賊巢諸軍吏各率永順保靖土兵爭先陷陣  
賊又大破奔入永安邊界地名立山特險結寨守仁摘調指揮  
汪良輔并目兵彭愷等於二十四日分路並進四面仰攻賊乃  
敗散又命布政林富副總兵張祐分投密切調各目兵廬蘇王  
受等分定哨道進剿八寨前後生擒斬獲并俘獲男婦頭畜器  
械殆盡守仁以八寨之地據其要害欲移設衛所以控制諸蠻  
復於三里設縣迭相引帶親臨相視思恩府基景定衛縣規則  
蓋南丹衛舊僻在廣西極邊之地非中土之人所可居者於是  
移築於周安堡正當八寨之中以阻扼其道路之衝則柳慶諸  
賊不必征勦皆將效順服化思恩舊治原在寨城山內尚歷高

山數十餘里乃令移出橋利六十里外地名荒田四野寬衍之處開圖立里用漢法以治武緣之衆夷夏交和公私兩便復移鳳化縣治於虞鄉爲立解宇屬之思恩又於宣化恩龍地方添設流官縣治是皆保治安民之要也又增築守鎮城堡於五屯以壯威設險仍選取協守兵及附近土寨目兵擇委智略忠勇官一員重任而專責之使之訓練撫擊務在地險旣設而士心輯和又令叅將兵備等官不時親至其地經理而振作之則賊勢自摧又將思田分設九土巡檢司各立土目衆所信服者管之節次具疏奏請定奪奉 旨王守仁受命提督軍務蒞任未久乃能開誠宣恩處置得宜致令叛夷畏服率衆歸降罷兵息

民奇功可嘉寫勅差行人齎去獎勵還賞銀五十兩紵絲四疋  
裏布政司買辦羊酒送用九月初八日行人馮恩齎勅書并  
銀幣行至廣城是時守仁卧病床褥已餘一月扶病具疏謝恩  
而病勢日篤猶力憊視事先是守仁年十五歲時夢中嘗得句  
云卷甲歸來馬伏波早年兵法鬚毛皤莫知其謂至是舟至烏  
蠻灘舟人指曰此伏波廟前灘也乃呀然登廟禮拜如夢中所  
見因誦夢中詩且嘆人生行止之不偶云乃於十月初十日復  
上疏乞骸骨就醫養病因薦林富自代守仁病革又一月乃班  
師行至大庾嶺謂布政使王大用曰爾知孔明之所以付託安  
維乎大用遂領兵防之爲敦匠事於舟中命家童陳歛具木月

二十九日未時行至南康縣將屬續之際家童在傍問其所嚮  
守仁曰我他無所念平生學問方纔見得數分猶未能與吾黨  
共成之爲可恨耳遂屬續而逝昇至南安府公館而歛柩經南  
頓雖深山窮谷男女老弱皆縞素出迎道左匍匐哀號若喪考  
妣凡所過江西地方行道之人無不流涕撫棺慟哭而去江西  
巡按御史儲良材奏計至吏部尚書桂萼欲因其乞回籍就醫  
養病疏叅駁害之令該司匿其計不舉乃叅其擅離職役及叅  
其處置廣西思田八寨事恩威倒置又詆其擒宸濠軍功冒濫  
乞命多官會議先此因閣老張孚敬見其廣西所處思田岑  
猛諸子及盧蘇王受經畫得宜并征剿八寨有方奏至甚喜極

與稱其不可及欲卽爲揭帖薦入內閣桂公楊公聞之皆不樂而益恐乃嗾錦衣衛都指揮聶能遷誣奏其用金銀一百萬緡載至京託黃綰過送與張公故薦用兩廣綰疏辯其誣奉 旨黃綰學行才識衆所共知王守仁功高望隆輿論推重聶能遷這廝捏詞妄奏傷害正類都察院便照前 旨併嚴加審問務要逐一追究與代做奏詞并幫助奸惡人犯來說黃綰安心供職不必引嫌辭避 上怒下能遷於獄杖之而死明年春 上將出郊桂密具揭帖 上遂允命多官會議遂削世襲伯爵并朝廷常行卹典贈諡皆不霑被至今人以爲恨守仁天資絕倫讀書過目成誦少喜任俠長好詞章壯好仙釋旣而好學以斯道



爲已任以聖人爲必可學而至實心改過以去已之疵舊不顧身以當天下之難上欲以其學輔吾君下欲以其學淑吾民倦倦欲人同歸於善欲以澤覆天下蒼生人有宿怒深讐皆能忘之而不較雖處富貴常有煙霞物表之思視棄千金猶如土芥藜羹瓠鼎錦衣緼袍大厦窮廬視之如一真所謂天生豪傑挺然特立於斯世者近古誠未見其比云

孔間傳道錄云隆慶初復伯爵世襲謚文成萬曆初從廷臣議詔天下從祀孔子廟庭稱先儒王子

廖玘詳吏部北直東光人嘉靖元年任三年改吏部尚書歷少保

陶琰字廷信別號逸菴山西絳州人舉成化辛卯省試第一登  
辛丑進士下外艱服闋授刑部四川司主事弘治戊申陞山東  
司員外郎故事刑部以獄訟繁劇奏讞惟艱擇老成明練者典  
部章疏謂之本科時大司寇特以任琰凡諸章疏無不委曲盡  
情事者而諸司有疑事亦輒以屬斷比歲審錄又多所平反上  
下稱明焉未幾陞陝西按察司僉事癸丑陞副使整飭固原固  
原爲西邊要害唐陷於吐蕃宋沒於西夏成化初滿四之變三  
鎮幾搖固天下至險要區也琰至練士卒繕器械廣芻粟積數  
年邊無警居人以安辛酉陞福建按察使去任未逾月而固原  
告變日無寧居琰在福建廉介絕俗每飯惟一蔬甲子陞浙江

右布政使半載積羨銀萬兩悉入官帑乙丑陞福建左布政使正德元年調山東至今閩浙士夫言廉者猶曰陶公琰云在浙時言官會列藩臬之賢者薦於朝列置第一陞都察院左副都御史巡撫河南至則首黜賊吏黃金寶等屬吏震懾有望風解印綬者丁卯陞刑部右侍郎適陝西遊擊徐謙訐奏御史季高而謙故豎瑾黨也又厚賂瑾欲中高以危法會上命琰往覈其事琰據法直高謙以告瑾瑾怒遂矯詔下琰獄禁錮幾兩月乃罷官去瑾怒未已復兩以他事罰米四百石又追奪誥命是時瑾勢方熾烈矢迅無敢抗犯者率首鼠謝過幾脫死而琰獨安之弗懼也庚午秋瑾伏誅言官交章論薦詔

遷左副都御史總督漕運兼巡撫鳳陽聞命單車至鎮至則  
廉得諸幸豎官民之豪骨者悉治以律權勢斂手且淮乃南北  
襟喉要貢獻必由之路中使往返求索無厭而督運武臣又往  
往侵漁其間爲奸利事軍民病焉乃榜諭以法常廩之外一毫  
不少假而又率以勤廉俾知敬畏未嘗有一人敢犯禁者辛未  
轉南京刑部右侍郎是年七月河北賊劉六自北而南犯姚源  
洞賊王浩八自西而東犯狀聞陞右都御史總諸軍事至則劉  
六已殄滅王浩八已聽招撫人心甫安而寧紹瀕海屬邑颶風  
大作海堤毀者三百里居民漂溺者以萬數琰聞之憂甚乃親  
按其地亟出帑銀多方賑救遂生萬餘人仍委官築堤捍水自

蕭山至餘姚凡五萬餘丈琰慮姚源賊譎詐難信乃奏設兵備及簡拔羣寮之有才者分守要害處置周悉明年春前賊果率衆突入境琰亟臨督戰賊潰走乃進兵襲之餘黨悉平捷聞賜璽署獎勵陞俸從一品又賜白金文綺有差賊平之後琰以開化常山遂安蘭谿爲盜出沒要衝乃議城四邑凡未閱月而訖立因引疾求退禮部詔歸許會總漕員缺復推往督之至淮一如前冷然乞歸志益堅疏凡誌上皆溫旨褒答最後乃得請仍許乘傳歸歲給祿隸家居垂七年帝廷臣薦者凡十餘疏辛巳夏世廟登極乃復起總督漕政淮民喜遷於道左歡聲雷動尋進戶部尚書兼左副都御史仍任前職壬午改工部尚書

啓行之日淮民傾城出送歔歔號泣至易巖以著去思云是年  
冬三載秋滿 詔賜羊酒寶鏹癸未改南京兵部尚書加太子  
少保叅贊機務至南都屬歲饑死者相枕藉乃移文諸曹盡出  
其所積以助賑濟仍咨戶部預給軍糧數月用是米價頓平人  
賴以生者無算事皆已行而後具 聞而又裁抑內臣進貢快  
船其數視常減半至今官民賴以弗擾時年七十有五累疏乞  
休言官疏乞慰留者再又具疏乃得請 詔加太子太保給驛  
歸如故仍令有司歲時以禮存問繼又 賜詔褒嘉抵家而言  
官猶每疏乞起用戊子奉 恩詔命有司絳帛羊酒勞問進詣  
光祿大夫琰有別業在城西二里許汾水之陽鑿池種蓮間徑

植菊每風日晴和輒命童子携筆牀茶竈引肩輿造之徘徊其  
間或據榻吟哦寄情翰墨至壬辰七月十九日以疾卒計開  
少保諡恭介 諭祭九壇 詔工部給棺木及遣宿治墳琰天  
性至孝四時祠廟有事雖老猶夙興率子孫躬奠如儀處宗族  
以厚遇鄉黨以恩有窮困失所者恒捐金濟之有喪者助之以  
棺平居嚴毅人不敢干以私自奉節儉自常祿外一毫不取雖  
交遊贈遺一無所受每罷歸行李蕭然惟三竹筥而已大學士  
李公時稱其自登第以及撫仕理繁劇禦寇盜屢試於盤錯而  
又守官轟然才足以濟其行立朝侃侃居鄉恂恂節抗權奸清  
鎮雅俗至老而貞方不詭少壯一節爲世名臣云

泰金字國聲直隸常州府無錫縣人自童時卽穎秀不羣見兒  
戲每卻避之端默自若父早牧公授之啓蒙諸書退爲家人解  
卽能了其大義一日早牧公對客以陸續命課一詩金援筆立  
就其詞曰公紀因心孝懷柑奉母慈拜時曾墮地袁術大奇之  
滿座爲嘆謂爲神授至今傳之稍長事唐元敬進士又從宗人  
豫齋先生經學蹊徑豁然大通爲文日有繩尺丁母王夫人憂  
毀瘠如禮自爲之立傳歲丙午年二十由儒士赴選自郡邑以  
至督學御史三試皆第一是歲領南畿鄉薦早牧公欲大成之  
不遣會試亟令就西塾讀書如故越弘治癸丑中進士故相徐  
文靖公溥在位召試館職金以父老急歸省不就文靖愈器重



之嘗謂人曰釋褐新進能知忠孝大節不有秦氏子耶乙卯授  
戶部福建司主事委督太倉糧儲明年監臨清倉勘順天等府  
災歉監收長安四門倉及象房糧芻剔抉蠹撫綏悍獗職盡  
而舉大司徒太原周公經簡視諸司章奏事有盤錯多所裁決  
尋陞河南司署員外郎再進山西司署郎中時邊書告警軍食  
不贍太宰清溪倪公岳司徒獨山伯公鎮惠之謂非異才不能  
急濟乃超本司郎中計糴糧餉徐陳時宜曲中緩急二公謂爲  
得人癸丑丁父憂泣血三年不與戶外事正德改元服闋復除  
戶部四川司郎中時戚畹恣騎中璫擅權奏討引鹽運袂以攘  
金持之不可大司徒洪洞韓文執奏至再其風稍稍寢革繇是

卿者怨金嗾邏事者橫撫之竟無所得戊辰陞河南按察司副使提督學校以身範士嚴立課程哲於品藻凡所甄拔率多嚮用朝紳之士自郎署以至公卿翹然而賢者半爲門人庚午陞左叅政分守大梁道時劇賊劉六劉七等嘯聚亡命長驅河洛所過焚城邑殺吏民將薄封丘金先期設備繕城堡峙糗糧會叅將宋振提兵南下馳檄邀之翼以民兵鼓戰遇賊於陳橋剗却村大奮擊之斬賊首若干級生擒其魁封丘晏然士人生爲立祠是歲陞山東右布政使癸酉轉左重念民遭賊刃極意拊循凡勢要請託翔價賣鈔等蠹民數事卽日禁除民大感悅甲戌陞都察院右副都御史巡撫湖廣地方釐理軍務挾二僕以

從不携妻子所至問疾苦誅姦貪威警惠流 奏上便宜八事  
繼上十事皆艱危切務巨盜盤結四面蜂起乃擒賀璋廖琪於  
江討徭耋於郴桂靖叛苗於香爐峰其功最著己卯逆濠告變  
大駕親征中官李鎮附麗郴賊橫肆誅求禍且不測抗辭直奏請  
以一身當之民免於毒庚辰陞戶部右侍郎辛巳改吏部尋改  
戶部左時大司徒九峰孫公在召未至攝部事清理勦戚莊田  
禁革勢要鹽引創籍勾稽兩直隸十三省通負國用漸充先是  
郴桂功成陞俸一級蔭一子爲錦衣衛世襲百戶金疏辭免至  
是世宗皇帝嗣登大位錄舊勞 賜之白金彩幣仍晉俸級  
如勅癸未陞南京禮部尚書尋改南京兵部尚書叅贊機務是

冬改戶部尚書因條陳奏處時政以備國儲凡數事琅琅千餘  
言一言一藥皆治世公忠丁亥乞身歸田上賜璽寶鈔乘  
傳以歸仍命有司歲給興隸月給廩有差時年六十一宰執大  
臣暨諫官御史百執事皆詣闕請留既歸言者不已章且數  
上辛卯復起南京戶部尚書奏准南京內官各衙門網稻草  
每包折銀二分四釐南京戶部定場草每包折銀一分八釐俱  
解本部銀庫收貯出給通關回銷其額派草包行令鋪戶按季  
上納完日赴部領價又折絨以防積朽折綿價以順人情公私  
俱便壬辰改工部尚書時廟工方殷夙夜在公督事維謹料理  
有法大工賴之甲午六載考績進太子少保累疏言歸乙未加

太子太保改南京兵部尚書丙申年七十據禮引謝奉 溫詔  
賜歸其鄉歲給興廩如初既家居動關世教賓客過從每語不  
忘朝廷天下大事退率諸孫課其舉子業臨文目爲點竄見其  
學業向進欣欣樂之寓城中有後樂園山有鳳谷行窩間一造  
焉必與客退就寢室左右圖書日弄筆墨爲事間遺故人手自  
勒狀間發之詩歌以相贈答終其身不衰以嘉靖甲辰正月二  
十七日卒贈少保諡端敏

李充嗣字士修四川成都府內江縣人先是太夫人感異夢誕  
充嗣在襁褓寡母啼哭及五六歲恬靜沉默一無所欲或戲觸之  
惟端視不語家人咸謂不慧而父愚菴翁獨識之曰此兒神氣

非常不可易也一日翁觀書真之膝傍俛然若有所思翁心異之指案上書曰是何物也又疑然若有所辯而未能者趣之對徐言曰所謂載道之器非與翁大驚曰吾嘗謂此兒不可易果然翁從仕吳楚皆携以隨巾角能草書工吟咏翁每以末藝爲戒遂棄其舊習一意慕古既而以治易故用伯父素翁謀偕北學京師爲西充少宗伯馬廷用門下生初至有邊報告急馬私試策舉兵儲爲關防印席揮毫遠以卷呈所對區處精當皆有證據馬稱其年稚才老雖練達邊事者殆不爲過衆因卜其後當大用暨成化丙午領鄉薦進魁丁未進士選入翰林庶吉士及徙戶曹主事旋改刑曹主事審鞠悉中多所平反以累謫判

岳州嘗勘九溪夷情益大獄也持牘立判庭中以不冤頌之秩滿擢知隨州始視篆以學舍傾歛廼謀葺新之工費不逮於民承荒曠之餘坊里凋瘵則講求義倉之法酌宜而行歛散有方凶歉有備境內以安民兵久弛則簡閱以時士益精銳後有巨寇流入境率衆拒之盡殲焉尤保愛士人嫉惡異說有李氏子名中者才敏而學贍以新籍爲桀猾者所擠乃力主之後果舉鄉薦第一又有名銅籬者方外士也自謂精於修煉卽遣隸捕執之驅出境不令惑衆三載考最陞陝西按察司僉事正巳帥物貞一憲度分理邊餉以公勤著聲時有中貴撓法正色不少屈常計事公署不合語侵之卽危言切責劾其貽害地方十餘

事疏上 孝廟褒其直中貴卿之欲甘心焉十六年會患菴翁  
計至去位獲免服闋以太夫人故欲圖終養未卽上道而 孝  
廟陟遐正德改元閣瑾用事蓋中貴黨也必中傷以泄舊憾密  
遣其黨下陝西伺察久無所得事遂寢乃擯其服制違例矯  
旨免官未幾太夫人亦捐世五年方禪而瑾誅以尋有 詔復起  
補任江西以風力名時宸濠逆節未著縱下淫毒壹繩以法民  
恃以無恐楚賊據華林勢甚熾我師數不利與總帥都憲王公  
贊畫竟致大捷六年以功晉山東按察司副使兵備臨清齊俗  
侈靡而臨清尤甚乃教以儉約奢風遂熄於除戎不虞之事罔  
不殫心力爲之雖處宴安之時惴惴焉常若寇至狀八年轉雲



南按察使一時聲稱凜然尋轉本省右布政使十年召爲順天府尹行未半道遷都察院右副都御史巡撫河南振肅風紀扶植教化權抑權豪屏黜貪墨至有望風畏懼解印綬以遁者汴地下濕多河患積逋無筭至卽疏聞咸賜蠲免民力稍蘇正德丁丑蝗戊寅澇民間大戚老者死壯者逃立條約下諸屬郡郡行之州州行之邑祛減尅之弊日夕與寮屬商處期得善策至終夜繞榻不寐偶得休糧方於書笥歎曰天若濟民此方必效靈吾不忍藏乃刊示四路民得此以活者甚衆汴洛故都會陵墓在焉盜利其中之所有多被發乃峻爲之禁令近屠者守護防衛由是未發者始得全時鎮守藉進奉名虧值市物如

古器羔皮之類深爲吏民病徐以溫言諭止之是後厲階以除  
十三年再徙巡撫南畿尋遷戶部右侍郎兼都察院左僉都御  
史巡撫如故其綏安之方採荒之術大都如河南時政而儲運  
之法裕國之計恒放諸大義叅以民情時稱其便聞宸濠將稱  
兵犯闕以安慶畿輔適當賊衝非得人莫守也值都督楊銳時  
爲指揮使及諸將晨叅於衆中揖而進之曰皖城保障委之於  
子母負我乃 奏請使視事而白巖喬公宇時任南畿本兵相  
與協心王室設方略飭武備日以禦賊爲念已而賊兵東向舳  
艫相接氣勢銳甚抵安慶城下攻具悉備目中已無江左矣允  
嗣飛檄城中喻以忠義銳感激思奮嬰城固守相機應敵日至

數十發無不克捷又潛遣間諜順流而下給云王師百萬四面至矣賊得諜語相顧錯愕城中偵知之士氣百倍鼓譟震地賊敗衄宵遯渠魁就擒武廟幸南畿詔許造膝親賜慰勞論功加太子少保工部尚書仍兼憲職巡撫頃之臺臣言東南財賦甲天下而水利之政久廢不講非常久計詔宰臣議僉議下其章於撫臣李某比受命親蒞其地尋訪淤塞故道多爲勢家所據力任衆怨無毫髮假借不逞者爲謗語上騰冀陰阻其事朝議復難之充嗣卽建白臣考禹貢水道所歸之由相地形高下之殊并正統中周文襄治濬舊跡則功無不可成者但恐成功之後不能無疑臣者耳時論建之由是盡心所事不

辭繁苦凡椿木畚鍤給賞顧直之需取諸屬帑羨餘委廉能官  
分幹一毫不干於民謂水之枝節多岐而白茆港吳松江二派  
最大首興事焉自經始至迄工凡三閱月而諸水旋亦就緒人  
悅於趨赴無怨心自是潮汐不憂壅滯淫雨不患汜濫蓄洩有  
道而旱澇有恃食其利者甚博而京儲不致於匱乏矣 世廟  
龍興被 詔陳言乃條上新政數事以正心用賢爲首務識者  
謂其知大體併嘉前績擢南京兵部尚書高士卒有恩遇武弁  
以禮有益於國家及軍民者率攘臂爲之否則揚刷擄蕩惟懼  
或後如馬快船素爲苦役乃汰其冗者取盈數而止貪猾無所  
媒利此類是也嘉靖丁亥以考績進階資德大夫正治上卿居

官清苦自圖書外無長物前後敷歷四十餘年所至以風裁自持然外和柔而內剛正以故始終不及於禍如閻忠孽彬在南畿恃扈蹕勢凌轢縉紳數有要求一切不與卒不能加害自晉尚書常曰大臣監止足吾不歸何待累疏乞骸骨蒙上溫旨諭留至戊子春移疾告歸是年九月辛年六十有七爲文簡古詩麗有悟山集兩任巡撫有奏議水利二稿當江西之變有靖危錄凡若干卷藏於家

王憲字維綱山東東平州人歷兵部尚書致仕嘉靖四年起兵部尚書兼右都御史總制陝西三邊時給事中鄭一鵬劾憲實緣權倖御史馬錄請舍憲別用上皆不聽憲簡靜嚴肅將士

凜不敢犯以功加太子太保廕子世襲錦衣百戶七年陞南京  
兵部尚書叅贊機務尋改都察院左都御史掌院事詳兵部  
胡世寧字永清浙江仁和縣人歷太子太保兵部尚書嘉靖八  
年三疏乞休上乃許致仕歸三月起南京兵部尚書叅贊機  
務再辭未任詳兵部

王廷相字秉衡河南開封府儀封縣人弘治壬戌進士任御史  
正德十年言時政忤旨下獄脩撰崔銑請執政申救出之十  
二年十二月陞四川提學僉事十六年陞山東提學副使嘉靖  
六年陞巡撫四川右副都  
御史本年回都察院協理院事七年陞兵部右侍郎八年轉左

九年陞南京兵部尚書十一年陞都察院左都御史掌院事十三年加兵部尚書兼左都御史不勘院事提督團營加太子太保二十年爲民

國琛集廷相儀封人氣類元不能撓居諫臺敢言謫縣丞益自勵贊理留都職舉弊絕後久給院章風表百司凜抑奔競有要地衆越禮趨之獨不往志好文廣集百家言作雅述以見向晚尚玄術羣小所愠者以是黜之

劉龍字



山西潞安府襄垣人弘治己未廷對勸上崇敬

畏倣逸欲獎忠斥佞建中和之極爲禮樂之本使政出於一而達之天下擢探花授編修遷修撰正德二年忤逆瑾出爲兵部

職方司主事五年陞吏部考功司員外郎持正不苟本年復修  
撰十一年陞侍講學士十五年改侍讀學士嘉靖元年陞禮部  
右侍郎本年丁憂四年復除右尋改左七年陞南京禮部尚書  
八年改南京吏部十二年改南京兵部尚書十四年致仕卒贈  
太子太保謚文安所在砥節礪行不與世浮沉爲講官講誠能  
動物章引黃河清爲証勸世宗謙以履盛約以持盈感溢天  
顏又抗疏論太后廟見并集議弭災十事又條宣大邊務六  
事整飭留務船料戰馬屯田十餘事凜凜守大臣之事云

王軌萬全開平衛籍直隸江都縣人弘治己未進士嘉靖十五  
年任十八致仕



湛若水廣東增城縣人弘治乙丑進士嘉靖十八年任十九年致仕

熊浹江西南昌縣人正德甲戌進士嘉靖十九年任

王堯封直隸定興人弘治乙丑進士歷總儲尚書嘉靖三十一年起任本年以劾致仕

張邦奇字常甫浙江寧波府鄞縣人十八舉鄉錄二十二舉進士改翰林院庶吉士正德丁卯授檢討命充經筵官以纂修

孝宗實錄成陞俸一級時逆瑾竊柄斥逐正士欲鉗制天下人使盡出其下獨守正不阿瑾亦終莫能危之既乃以親老乞養遂出補湖廣提學副使奉二親就養烏楚士局舊習梗弗變比至

散餘格嚴考校崇雅黜浮取士之法先德行而後文藝三四歲  
間楚士彬彬然率變化於道二親既久居楚弗樂日思鄣不置  
奇不忍奪又不欲朝夕離也乃上疏曰臣父母所恃以老者惟  
臣爾臣荷天子寵靈以叨有祿俸可備甘旨奉臣之父母就  
官舍養焉寔惟天子之恩茲臣父母老矣日思歸不置臣不  
忍奪又不忍朝夕離也願令臣得謝職事奉父母以歸亦惟  
天子之恩詔可既歸杜門掃軌承顏菽水有餘懽也溫清之暇  
唯尋繹經史一有所得則發而爲文乃著學庸傳五經說以推  
明天人之奧嘗曰古之人善言道也吾猶覺其意之浮於言也  
夫言固不能盡吾意也况知言之希也嘉靖改元上方勵志

堯舜之治日搜羅天下賢士以布之位用靳文僖公之薦復起提學四川至蜀闢大益書院拔名士居其中時考校之人才彬然用盛也未幾以王孺人之喪且念二親在遠復上疏乞休撫按因爲奏移近地復改提學福建蓋三授督學之命於茲凡十有四年矣丁亥進左春坊左庶子兼翰林院侍講未幾陞南京國子監祭酒在成均開朗蒙滯宣明德教言默動作示人準程自是良士勇善僞夫去飾情者益勤誕者益恭夏楚不設而教行焉四方士忻忻稱得師也先是諸史板在成均歲久多殘缺上用言者議特命訂校之與少司成貞齋江汝璧戮力共事正譌補廢炎黃而下由是有完史矣庚寅陞南京吏部右侍郎

尋丁洞雲公憂癸巳服闋改吏部右侍郎丙申進左侍郎時冢  
宰缺攝行其事抑奔競獎名節拔淹滯開誠秉公人不敢干以  
私銓部凡陞除例先白政宰以覘其意嚮奇曰黜陟當以公爾  
覘人意以用舍之則所遺者必多矣遂不復往白政宰尋有

旨以他人代攝銓部事居之恬如會翰林院缺長遂命以原職兼  
學士掌院事尋充日講兼講大學衍義纂修玉牒戊戌充會試  
主考所錄皆名士一時稱得人焉尋督四夷館己亥冊立 皇  
太子詔慎選官僚以老成舊學加太子賓客 世廟南狩顯陵  
命攝禮部尚書事至於奉先代祀涇藩題主先師釋菜皆 特  
遣之又念母氏沈年踰九十累疏乞終養 上弗允賜溫旨慰

留之有大臣祿養壽母自古治朝則有之語尋復以原職掌詹事府事壬寅九載考績進禮部尚書仍掌詹事府事奇具疏辭上曰卿學行端醇資望允協秩宗重任簡自朕心辭弗允是冬遘疾卧旬月歸思日切尋南京吏部尚書缺力欲就之銓部遂擬以上得俞旨忻忻然樂也會南京兵部尚書缺留都務視兵部特重上乃改兵部尚書叅贊機務乃時練習選勇武修城垣均驛役緩善禁奸軍民咸有寧宇留政默然未幾有疾風震雷之異竟以是夕不疾而逝年六十一訃聞贈太子太保謚文定性孝友天至事二親雖貴至金紫溫清定省旦夕不少衰洞雲沒母太夫人年九十餘奇歷南北必奉而隨焉伯兄信齋來

燕道卒於濟奇痛之每念及輒流涕以母道事其嫂終身不少  
異洞雲公晚得庶子二人尤撫愛之均財產與之其動止閑適  
與人語肫肫無矯飾而所學根柢於道文詞典則朴茂雖旁貫  
百家鈎引玄蘊而卒止於仁義道德也平生未嘗稱人之短而  
鑑別自精未嘗見疾言遽色而望之自不可犯未嘗立津涯以  
忤人而持身行己自不少屈嘗疏薛文清議曰恢恢乎容物之  
度而存恤不遺於孤微鑿鑿乎處事之精而冲曠恒超乎物表  
其介至於死生不易而與人惟見其從容其仁幾於造次不違  
而修己不忘乎惕勵篤實足以砥僞中正足以律偏純粹足以  
訂雜斯數語者可以占其所嚮云